

四庫全書

子部

欽定四庫全書

子部

續名醫類案卷二十一

詳校官太醫院吏目臣周世泰

編修臣倉聖脈覆勘

總校官編修

臣王燕緒

校對官中書

臣劉源溥

謄錄監生

臣陳箴

欽定四庫全書

續名醫類案卷二十一

痰

錢塘魏之琇撰

洞虛子曰痰之為病成偏頭風成雷頭風成太陽頭痛
眩暈如坐舟車精神恍惚或口眼攣動或眉稜耳輪
俱痒或頷腮四肢游風腫硬似疼非疼或渾身燥痒
搔之則陰疹隨生皮毛烘熱色如錦斑或齒頰似痒

似痛而疼無定所滿口牙浮痛痒不一或暖氣吞酸
鼻聞焦臭喉間豆腥氣心煩鼻塞咽嗑不利咯之不
出嚥之不下或因噴嚏而出或因舉動而吐其痰如
墨又如破絮或如桃膠或如蜆肉或心下如停冰鐵
閉滯妨悶噎噎連聲狀如隔氣或寢夢刑戮刀兵劍
戟或夢入人家四壁圍繞暫得一竇百計得出則不
知何所或夢在燒人地上四面烟火枯骨焦氣撲鼻
無路可出或因觸發忿怒悲啼兩淚而寤或時郊行

忽見天邊兩月交輝或見金光數道回頭無有或足
膝痠軟或骨節腰腎疼痛呼吸難任或四肢肌骨間
痛如擊戮乍起乍止並無常所或不時手臂麻疼狀
如風濕或卧如芒刺小安或如毛蟲所螫或四肢不
舉或手足重滯或眼如姜蜚膠粘痒瀋開闔甚難或
陰晴交變之時胸痞氣結閉而不發則齒痒咽痛口
糜舌爛及其奮然而發則噴嚏連聲初則涕唾稠粘
次則清水如注或眼前黑暗腦後風聲耳內蟬鳴眼

暈肉惕治之者或曰腠理不密風府受邪或曰上盛
下虛或曰虛或曰寒或曰發邪惟洞虛子備此疾苦
乃能治療病勢之來則胸腹間如有二氣交紐噎塞
煩鬱有如火火上冲頭面烘熱眼花耳鳴痰涎涕淚
並從肺胃間涌起凜然毛豎噴嚏千百然後遍身煩
躁則去衣凍體稍止片時或春秋乍涼之時多加衣
衾亦得暫緩或頓飲水水而定或痛飲一醉而寧終
不能遂去病根乃得神秘沉香丸屢獲大效愈人數

萬但不欲輕傳匪人故以隱括之詩曰甌裏翻缺甲蒂
金于今頭戴草堂深相逢二八求斤正硝煨青礞倍
若沉十七兩中沉半兩水丸梧子意須斟驅除怪病
安心志水瀉雙身却不任大黃蒸八兩黃芩八兩青
礞石一兩硝煨如金色沉香半兩

孫兆治綵帛鋪劉員外患傷寒六七日晝夜不得眠方
眠即起方起即倒未嘗少息看得厭倦名孫孫曰若
言是氣必作今無此症非氣也時復身上冷出汗尺

寸脈皆沉關中亦沉重診之鼓擊于指上此痰積寒聚于胸中也遂用陳皮半夏乾薑三物各一兩為飲薑半兩槌碎以水兩碗煎七分去渣分二服服藥經時遂睡經一晝夜不甦既覺下痰一塊如雞子大其病遂愈凡痰皆有冷汗其証明矣

張子和治一婦人心膈上結硬如斗按之如石人皆作病胎針灸毒藥禱祈無數如捕風然一日張見之曰此寒痰診其兩手寸關皆沉非寒痰而何以瓜蒂散

吐之連吐六七升其塊立消過半俟數日後再吐之
其涎沫類雞黃腥臭特殊約二三升凡如此者三後
以人參調中湯五苓散調服已平矣

朱丹溪治白雲許先生始因飲食作痰成脾疼後累因
觸冒風雪腿骨作疼衆皆以脾疼骨疼以為寒雜進
黃牙等藥雜治十餘年間艾灸數萬計或似有效及
至病再作反覺加重至五十一歲時又冒雪乘船而
病愈加至坐則不能起扶起亦不能行兩胯骨不能

開合若脾疼作時則兩胯骨痛處似覺稍輕若飲食
甘美脾疼不作則胯骨重疼增諸老袖手計無所出
朱謂此初因中腕有食積痰襍以胃寒濕抑遏經絡
血氣津液不行痰飲注入骨節往來如潮其涌而上
則為脾疼降而下則為胯痛非涌泄之法不足以治
之時七月二十四日遂以甘遂末一錢入猪腰子內
煨以食之連瀉七行至次日兩足便能行步至八月
初三日嘔吐大作不能起牀顆粒不食但時煩燥氣

弱不能言語諸老皆歸罪于七月之瀉而又知累年之熱補悞皆不敢用藥朱嘗記金匱云病人無寒熱而短氣不足以息者此實也其病多年鬱結一旦以刀圭之劑泄之徒動猖狂之勢他未有制御之藥所以如此仍以吐劑達其上焦以次第治及其中下二焦於初日用瓜蒂吐不透初六日用梔子又吐不透初九日用附子尖三枚和漿水與之始得大吐其嘔噦終止前後所吐共得膏痰沫液一大水桶初十

日遂以朴硝滑石黃芩石膏連翹等涼藥呔咀一斤蒸煎濃汁放井水中極冷飲之十一日十二日十三日十四日每日食上件藥一斤十五日腹微滿大小便皆秘悶朱欲用大承氣湯下之諸老皆以為不可十六日六脈皆歇至朱診其脈獨歇至卯酉二時其餘時刻平勻如舊朱曰卯酉為手足陰陽之應此大腸與胃有積滯不行所致當速瀉之爭論不已至十八日遂作紫雪半斤十九日早紫雪成每用一匙頭以

新汲井水化下至二十日天未明已服紫雪五兩神
思少安腹滿亦減遂收起紫雪不與二十一日大為
小便閉作痛所苦遂飲以蘿蔔汁半茶鍾隨手痛止
小便立通二十二日小腹滿痛不可捫摸神思不佳
遂以_大黃牽牛作丸服至三百九至二十三日巳時
小大便併通如爛魚腸三碗許臭惡可畏是日神思
少安診其脈不散至矣二十四日腹大絞痛殆不能
勝者約一時許腰胯沉重且墜兩時不出聲不能言

金匱要略卷二十一
瀉下穢物如柶油條者一尺餘腹中如燒片時方定
至二十五日神思漸安夜間得睡二十六日漸出聲
言語自初二日至此並顆粒不曾入口語言並不出
聲至二十七日方啜半盞稀粥者四次似有生意至
次月初四日方平安其脈自嘔吐至病安日皆平常
弦大之脈唯有中間數日歇至少異耳至次年四月
復行倒倉法方步履如初

徐東臯治匡掌科夫人三十餘病胃腕連胸脇痛日輕

夜重兩寸關脈弦滑有力諸醫積滯凝寒用發散及
攻下藥繼用鐵刷散四磨飲等方俱不效後用湯水
皆吐而不納經月不食痛且日甚徐謂其為痰鬱明
矣但痛久弱甚不敢行吐法奈何偶一醫謂五靈脂
末藥素用有效衆皆哂之曰此藥用之多矣徐謂再
用亦無妨何哂之有俾用酒調病者到口便吐隨吐
綠痰兩椀許痛即止遂納飲食此蓋痰在膈上攻下
之亦不去必得吐法而後愈經曰有故無殞此之謂

歟全書

孟望湖淮安人耳中聞人聲悉是祖考談其家事擾擾不休邀劉春齋醫治診之曰暴病之謂火怪病之謂

痰用滾痰丸下之而痊

續金陵瑣事

一男子吐痰胸膈不利飲食少思服海石瓜蒌之類不應曰此脾氣虛弱不能消導而為痰當健脾為主彼不信又服驅逐之劑其痰如涌四肢浮腫小腹腫脹小便瀦滯曰此復損脾腎所致也先用金匱加減腎

氣丸補中益氣湯治之諸症漸減又用八味丸煎前湯而愈

一男子素吐痰遇怒其痰益甚胸膈痞滿此肝木制脾土也用六君子湯加木香治之而愈

一婦人吐痰頭暈帶下青黃用四七湯送白丸子小柴胡加白朮茯苓治之而安

舊僚錢可久素善飲面赤痰盛大便不實薛以為胃痰壅滯用二陳苓連山梔枳實乾薑澤瀉升麻一劑吐

痰甚多大便始實此後日以黃連三錢泡湯飲之而安
一婦咳嗽其痰上壅日去五六碗作氣虛水泛為痰用
六味九料及四君子各一劑而愈

陳三農治一人痰出盈盆不止脈豁大無力此內傷不
足之症用人參附子各五錢乾薑革撥檳榔枳殼一
劑而愈

一人滿口痰珠至舌尖則成大泡綿綿不絕此火熱在
胃大寒在肺也用參附湯保定肺氣後以砂仁益元

散瀉胃火而安

一人痰涎壅盛汗出不止此脾虛不能攝痰而肺失所
養切不可作痰治只補脾胃為主用參朮煨薑各二
錢半夏一錢煎服愈

陸養愚治董潯陽夫人稟氣怯弱性情沉鬱年三十餘
得一病晚間發熱天明始止飲食漸減煩躁不安初
服補血養陰年餘轉羸瘦又服參芪補氣不效醫謂
脈已歇至恐不能久診之右手果然左手但微弱而

數詢其月事則先期而少曰先期是血熱應左脈之
數少是血虛應左脈之微脈症相應右手歇至此必
鬱痰伏在氣分故脈結不至非死脈也第發熱必有
所起之處令詢之則曰右脇一團熱起漸延遍身再
問熱起處必成形者按之果有柔塊如椀狀曰不足
憂也攻去其塊諸症自愈矣為製一方香附一斤醋
製與巴豆一兩同炒至巴豆黑色去之醋打麵糊為
丸梧子大米飯下五十九日三服又用四物湯加山

梔貝母豆仁木香薑棗煎日一帖半月塊消肌肉漸
長一月精神爽健矣

陸肖愚治李安吾正室不育及納妾則俱孕生子出痘
正者死而妾者生悲愁彌月遂胸脇脹痛每卧必令
人背上槌之良久方得就枕片時卧不能仰仰則氣
涌而喘食減肌消月事數月不行脈之寸沈而數關
沈而滑尺沈而弱脈與病應此鬱火成痰之症也用
調理養榮湯加白芥子倍霞天麩數劑胸脇少寬可

仰臥矣第大便五日不行小腹脹急與滾痰丸二錢
又慮元氣不足改用補氣養榮湯二劑大便去燥矢
數枚後出皆痰積脹痛減後與補藥間服月餘而安
吳遜齋體肥素有酒積胃脘作疼近又肢節痛而下體
更甚或以為風用史國公藥酒療之時作時止改用
虎潛河車等丸則痛處且腫脈之六部皆緩滑而關
稍帶弦此濕痰流注關節而痛非風亦非虛也治法
宜先用九劑清中宮之積痰繼用煎劑疎筋絡之壅

滯則肢節之痛除而胃脘之疼亦愈矣依法服之果
然丸方霞天麩山查橘紅白朮茯苓枳實神麩竹瀝
打糊為丸食遠白湯送下煎方蒼朮苡仁半夏南星
白芥子藏靈仙秦艽甘草青木香煎成入酒一小
盃半飽時服

潘元石怒後縱飲遂患吐逆飲食半留半出甚則嘔物
如褐色胸脇脹痛徹背或以翻胃治之反潮熱煩躁
又以肺癰治之飲食減而嘔脹益甚或見吐出之物

謂肺爛矣診之見其肌肉未消聲音不改兩寸滑數
左關弦右關滑兩尺平曰此非肺壞也第為鬱怒所
致耳怒則血苑于上與痰膠結濁陰不降而臍脹生
焉法當涌之用常山五錢紅花五錢酒一椀煎一椀
令通口服之一涌而出初見褐色痰塊後多紫黑約
有盆許胸膈頓寬背亦不痛不作嘔矣再以清氣養
榮湯調理

陸祖愚治沈振宇妾患鬱痰鬱火症醫咸謂不起矣診

之形容枯槁咳咯涎沫六脈沈滯隱隱似有似無重
按至骨或有力或無根或遲或數已飲食不進似胃
氣將絕者但自能起坐聲音響亮知為痰涎壅隔血
氣凝塞故脈亦不流通耳用二陳加豆仁蘇子黃連
白芥子貝母石菖蒲等味一劑未效再診聞病人喜
聞爆竹硝黃之氣遂于前方加薑汁竹瀝每劑入牛
黃半分調服症脈漸起再與加減五六日後進蘇合
九一九能餉粥再與六君子加減調理月餘而安

李江州因下第歸飲食不思精神倦困醫謂遠歸久曠
投以補劑胸膈痞塞大便艱難不寐又與養血安神
煩躁而小腹脹滿診之見其面容昏滯六脈沈滑乃
以枳實黃連瓜蒌陳皮貝母檳榔元明粉蕪服字九
三錢半日未應又以前九二錢催之良久腹中鳴轉
下矢氣去稠粘臭穢五色錯雜約半桶頓快繼以前
湯丸少少與之兩三日間糞微黃改用參朮歸芍健
脾養血調理而安

費表嫂患脇之下臍之上溫溫作痛可揉可按凡溫中
消導清火歷試不效診之六脈沈弦而滑以痰治之
數劑而痛止精神未復而勞于女工且患血崩食入
不化遷延數日胸腹脹滿其熱如火湯藥襍投致呻
吟不絕人事不省脈之寸關沈伏不見而尺尚沉滑
有神曰此沈痰之為祟也元氣雖弱痰結不得不通
用滾痰丸徐徐投之至半夜胸前隱隱有聲五更下
稠痰盆許神氣頓蘇胸膈少利再以養榮合二陳調

理半月而愈

張宇清少時體羸多病專主溫補病愈而火症時發乃
滋水制火其疾如失六味之力也迨壯年肥盛濕痰
醞釀于中仍滋陰不徹六旬外痰症陡發復六味加
二母歸芍麥冬服後痰涎壅塞四肢厥冷口開眼合
人事昏沈診之六脈洪滑而數遂用加味導痰湯繼
之蘇合丸兩劑纔覺神清問用何藥以前方告乃怒
曰我生平最忌燥劑豈可服此今後斷不可用乃郎

心知父言之非每日以地黃湯一劑與驗過暗煎導痰之藥以進病愈後洞悉前情不勝歎仄

孫文垣治李古愚每食後即大便腹皮稍脹急胸膈飽悶服參朮則痞悶愈甚小水清長脈之左寸瀯右寸滑按之如黃豆大且鼓指關尺皆弦小左尺迢迢有神據按乃積痰鬱于肺莫能出以致大便之氣不固也當效丹溪治乃叔用吐法吐去上焦痰積大便自實矣先用苦梗蘿蔔子各三錢白豆仁橘紅山梔各

一錢以川芎五分生薑三片葱三根水煎服之取吐服半時許吐出清痰惡心未已乃痰積膠固不易出也又蘿蔔一合搗漿水加蜂蜜與半椀飲之始吐膠痰二椀餘平日每小水則大便並行吐後小水始能單去連三四次胸腹寬舒初亦以吐為懼至是豁然稱快大便五日一行再以二陳加白朮旋覆花麥芽調理全愈

李士材治章給諫暑月心中大痛醫與香薷飲痛轉增

而寸口弦急痰食交結也服香砂二陳二帖痛雖畧減困苦煩悶更以胃苓湯加半夏二錢大黃三錢下黑矢數枚痛減三四仍以前湯用大黃四錢下膠痰十餘椀始安

徐主政勞且怒後神氣昏倦汗出如浴語言錯亂危困之極脈之大而滑且軟此氣虛有痰也用補中益氣湯料併四帖為一劑用參至一兩加熟附子一錢熟半夏三錢四日稍甦更以六君加薑汁一鍾服數日

兼進八味丸兩月而安

王郡侯患痰嗽輒服清氣化痰丸漸至氣促不能食李
曰高年脾土不足故有是症若服前丸則脾土益弱
矣投以六君子湯加煨薑三錢益智仁一錢五分十
劑而痰清更以前方煉蜜為丸約服一斤飲食乃進
朱文學遍體如蟲螫口舌糜爛朝起必見二鬼執盤食
以獻向李泣曰某年未三十高堂有垂白之親二鬼
旦暮相侵必無生理診其寸脈乍大乍小意其為鬼

崇細察兩關弦滑且大遂斷以痰投滾痰丸三錢雖
微有所下而病患如舊更以小胃丹二錢與之復下
痰積及水十餘椀遍體之痛減半至明早鬼亦不見
矣更以人參三錢白朮二錢煎湯服小胃丹三錢大
瀉十餘行約二十椀許病若失矣乃以六君子為丸
服四斤而愈

張路玉治一燕人體肥痰盛善肉善飲患痰鳴喘嗽數
年食傷恒發發則六脈遲滑時見歇至聲如拽鋸遍

地皆痰每歲或一二發或三五發深秋初冬尤甚遂
用倒倉法自言肢體皆輕症遂愈二年後因不禁牛
肉復發然其勢較前不過十一是亦不慎口腹所致耳
郭邑侯夫人素有敗痰失道左右兩脇俱有結塊大如
覆杯發則咳嗽喘逆腹脇掣痛六脈止促按之少力
用六君子湯加膽星枳實香附沉香二劑服之大吐
稠痰結垢一二升因嘔勢太甚促往診之至則嘔止
嗽寧脈息調勻不必更藥矣

黃履素曰立齋治痰每言腎虛水泛為痰法當補腎予
壬申秋咳嗽多痰自知因于色遵先生法恪服六味
丸更不治痰嗽月餘竟愈時師治痰最忌熟地以為
膩膈是烏知箇中妙理哉

龔子才治周藩海陽王患痰嗽喘熱左足腫痛日輕夜
重每年發一二次已三十年遍治勿效診之左微數
右弦數此血虛有濕痰也以四物湯加蒼朮黃柏木
瓜檳榔木通澤瀉空心服以治下元茯苓補心湯卧

時服以治上焦各三服而愈後以神仙飛步丸空心服清氣化痰丸臨卧服各一料全瘳

張三錫治一中年婦每夜發熱天明方止症兼惡心不食肢倦且云體素肥今漸消瘦因憶古人有言昔肥而今瘦者痰也痰滯中宮阻礙升降宜乎不食且作惡心病悶血無所滋因而不足故夜熱乃以二陳治痰參朮補中氣枳實麥芽寬中香附炒梔子清火柴胡退熱凡二十劑間服橘半枳朮丸一月愈後進入

參湯體漸復舊

一人素肥盛半年漸瘦兩膝與背互痛內尺沈滑古人
有言昔肥而今瘦者痰也遂以加減露痰湯連進數
服一日食後或作惡心乃以瓜蒂散一錢投之吐稠
痰半升而愈

朱丹溪治一人項強痛不可忍不可以回顧作痰客太
陽經之法治之用二陳湯加酒芩羌活紅花服後二

日而愈

治法
彙

張路王治吳別駕夫人患痞眩嘔逆向因下體畏寒肢體麻木久服八味參附不徹六脈弦滑按之則濡此中焦數蘊痰濕陽氣不能周于四末之象得桂附辛熱之力有時雖可暫用究非真陽之虛且有地黃之滯所以痞暈漫無止期遂與局方七氣湯加沉香一服豁然再劑神爽食進而安

薛立齋治一儒者脾胃素虛而有痰或用導痰之法痰甚作渴頭暈煩熱謂中氣虛弱而變症用補中益氣

湯而愈後勞役發熱此氣虛不能上升也用前湯加
蔓荊子而愈後又勞神畏見風寒四肢逆冷口沃痰
涎此脾氣虛寒真病以六君子加炮薑肉桂而愈

一男子素腎氣虛而咳痰亦用導痰之法虛症悉具痰
涎之涌小便頻數謂足三陰虛而復損也朝用補養
脾氣湯培養脾肺之虛氣夕用六味丸加五味子收
斂耗散之精而愈

大尹陳克明導痰後痰益多大便不實喜極熱飲食手

足逆冷謂命門火衰而脾肺虛寒不能攝涎歸源用
八味丸而愈

進士張禹功飲食停滯胸滿吐痰或用藥導之痰涎上
涌眩暈熱渴大便秘結喜冷飲食手足發熱謂腎水
虛弱津液難降敗液為痰用六味丸而愈

儒者楊文魁素嗜痰諸藥不應服牛黃清心丸吐痰甚
多或頭暈或熱從脇起左脈洪大有力右脈浮大而
無力薛曰此三陰虧損火不能歸源用補中益氣加

麥冬五味及加減八味丸補其化源而愈

秋官張碧崖面赤作渴痰甚頭暈此腎虛水泛為痰用
地黃丸而愈

儀制賀朝卿吞酸胸滿痰盛作瀉飲食少思用清氣化
痰等藥前症益甚兩膝漸腫寒熱往來謂脾胃虛濕
熱下注用補中益氣倍參朮加茯苓半夏炮薑而愈
考功楊樸菴嘔吐痰涎胸腹脹腫飲食少思左關脈弦
長按之微弱此木尅土用六君子加柴胡山梔木香

而愈

二守陳子忠飲食少思吐痰口乾常服二陳枳實黃連
之類脾胃受傷乃問于薛薛述東垣先生云脾胃之
症實則枳實黃連瀉之虛則白朮陳皮補之彼遂以
二味等分為丸常服由是多食而不傷過時而不飢
趙以德云予近治一男子肩井後腫痛身熱且嗽其腫
按之不堅此乃酒痰流結者遂用南星半夏瓜蒌葛
根芩連竹瀝作煎飲燒葱根增腫處另用芥子白礬

作小丸就煎藥吞二十九須臾痰隨嗽出半日約去

三四椀病即愈

全上

羅成之既得丹溪之學歸隱崇明三沙張太尉士誠患

痰氣怔忡諸名醫治療不效迎成之診之主以倒倉

法張卒用其方諸病悉除賜勞甚厚

醫史全上

陸祖愚治孫景陽室年近五旬向患痰火發則頭空眩

暈飲食減少旋發旋愈蓋有年矣近發轉甚將及月

餘診之六脈洪滑而數按之有力肢冷面赤肌肉黃

瘦不時眩暈甚則昏不知人水穀不進其症似不可
攻然其脈來有神當棄症憑脈乃用枳實瓜蒌膽星
貝母芩連橘紅牙皂入薑汁竹瀝服之吐痰數椀四
肢漸溫再用川牛黃五分配以蠟丸頓服三丸徐徐
頻飲竹瀝催之腹鳴響後服潤字丸三錢便垢穢若
干病頓減後以清火消痰健脾養血調而安

吳淑止室軀體壯盛自來有痰初出口時稀白澄清唾
地良久反極稠膩遇勞即暈眩昏冒近則兩三日一

發始則叫號既而昏憤角弓反張食頃乃甦四肢厥
冷胸腹滿硬六脈如絲細而且澹以為寒痰凝滯中
焦用二陳導痰湯半夏與四五錢服後一夜不安痰
壅愈甚口舌燥渴因想脈症不同此當棄脈從症改
用貝母芩連桔梗花粉前胡膽星瓜蒌竹瀝薑汁煎
湯吞潤字丸五分數服後胸膈柔軟昏暈已除大便
數日不行用滾痰丸三錢不應又以潤字丸三四錢
催之始得更衣症減半兩旬後遂晡熱脣紅面赤乾

效無痰胸膈不暢竟似弱症乃清晨服丸藥生地麥冬銀柴胡黃連知母鱉甲秋石歸芍杜仲食後服煎藥貝母黃連查橘枳朮前胡花粉豆仁如是出入增損養血順氣清火消痰兩月全愈

薛立齋治一男子素厚味胸滿痰盛此膏粱之人內多積熱與法製清氣化痰丸而愈彼為有驗修合覬送脾胃虛者無不受害

一婦人元氣素弱痰氣時作或咽間不利或胸痞等症

以為鬱結傷脾加味歸脾湯治之而愈後遇恚怒前
症仍作惑于衆言以為痰飲妄用祛痰之劑吐瀉數
次變諸異症口噤不省以為脾胃復傷日用六君子
一劑米飲濃煎常服匙許至四日漸進粥食乃服前
藥間以歸脾喜其胃調養兩月餘諸症悉愈

傅青主治一老人患痰涌喉間氣不得出入其間具棺
待殮先生診之曰不死令搗蒜汁灌之吐痰數升而

魁

劉紹敏九
疇古文

王肯堂曰余初喜唾痰愈唾愈多已而戒之喉間梗梗
不可耐輒呷白礬湯數口咯入口中用舌攪研令碎
因而漱之百餘津液滿口即從鼻中吸氣嚥下以意
送至丹田默存少頃咽間清泰如未清再漱再嚥以
化盡為度方略出時其味甚鹹漱久則甘世人乃謂
痰濁之物無澄而復清之理何其謬哉吾嘗渡河見
舟人掬濁流而入之甕糝入礬末數分即時澄清此
可悟治痰之法也

丹陽賀魯菴年七十餘膈間有不快飲食少思初無大
害就醫京口投以越鞠丸清氣化痰丸胸次少寬日
日吞之遂不輟口年餘困頓不堪僦舟來訪問脈于
王則大肉已脫兩手脈如游絲太豁絕不至矣見王
有難色因曰吾亦自問必死但膈滿太甚大便秘結
不通殊以為苦但得少寬即瞑目無憾也因強王疏
方以至親難辭教用人參白朮之類大劑進之少頃
如廁下積痰升許胸膈少寬更數日而歿蓋二九乃

時師常用之物本欲舒鬱適增其痞本欲清痰適速其斃豈可恃哉

薛立齋治一人胃弱痰盛口舌生瘡彼食滾痰丸愈盛反瀉不止惡食倦怠此胃氣被傷也以香砂六君子湯數劑少可再以補中益氣湯加茯苓半夏二十餘劑而愈夫胃氣不足飲食不化亦能為痰補中益氣乃治痰之法也苟虛症而用峻利之劑鮮不危矣

施浩然治莫進士公謨患痰嗽日吐痰數孟形體瘦削

僉曰火症純用柔劑診之曰此肝木乘脾也脈浮而
關弦面黃而鼻青補之則瘳瀉之則劇用六君子加
炒芍薑汁製連二劑不信仍用山梔黃柏之類更教
以神首佐養飧施曰三日後大瀉絕粒奈何經云陰
劑柔勝積凝水為洞泄寒中之屬則真火微而衛散
至三日果大瀉脈脫鼻息如冰口不能言彼醫曰脈
脫矣大勢其在今日乎急投附子或可救也曰無庸
昨梔柏而今烏附何冰炭反掌耶寒涼過劑脾氣大

傷食復滯之按之則楚先取山查作液少服旋進獨
參湯病雖劇無慮也用異功散出入調理而痊

沈明生治玉峰李煨侯苦志士也病萌于己亥夏風鶴
之驚至九月間夜讀忽覺神思昏沉中心若墜嗣後
怔忡不已一友見其素稟清弱勤于鉛槧虛症昭然
勸令服參越兩月困怠轉加眩暈特甚則以為參少
力薄故益至五錢一劑約三四兩後見病日深輟參
勿服歷叩醫或以為陰火亢盛當成勞瘵者或謂其

冬得春脈當春不能再見者或斷之終至癩癩者醫
更藥襍歲將暮延診曰從前所議皆不悞也所以不
即愈者未治痰也今當崇事豁痰徐議其虛可耳遂
用二陳湯加鈎藤菖蒲等味漸進煎劑書一案云思
慮傷神痰乘包絡以致虛靈之宰不獲自持時覺心
繞千絲時覺腹空無物獨處則萬慮紛紜臨事則五
色眩瞶痰上逆也痰為火擾夜卧難寧痰助陽明多
食不飽沉于精道則夢失見之脈候則滑弦治宜先

標後本驅其壅閉俾神明之官仍安厥位繼以補血
養心庶滋潤之品不致泥隔而餘疴不治自瘳矣歸
致寧神至寶丹一料送服入春全愈

錢國賓治無錫劉元女咳嗽吐痰氣短經閉骨瘦如柴
但不夜熱以新壻不相顧病益劇劉延診以決死生
六脈結滯或五七至中一止十餘至中一止兩關更
實凡勞症脈當芤細弦牢短促今見痰脈非勞脈也
以導痰湯枳實半夏膽星蒼朮茯苓陳皮白芥子各

一錢甘草三分加熟大黃二錢二三帖下痰少許身體困極以參湯調理漸安令服八珍湯而別

劉雲密曰愚于戊戌歲冬深終之氣主氣寒水既與司天相合而客氣濕土又與在泉相合更加于主氣寒水之上其病于陽氣甚矣氣乃肺主之故肺易受寒邪既病于主氣之肺則陽氣益不得施化而水中之陽化更微致濕淫滋患故濕痰生聚于胃而不行是濕痰愈覆其陽則肺之鬱熱遂口舌為燥而肺所治

之上焦亦俱不爽且移于所合之大腸而化風矣治
之者宜麻黃杏仁葦以散寒炒乾薑製白朮以除濕
第所鬱之熱驟以薑朮投之適益其勢耳乃散寒以
麻杏而除濕暫用二陳加南星乃入蛤粉于中以歸
陰僭而散陽鬱其痰漸化而熱亦行徐以乾薑白朮
枳實葦理中乃得全愈

飲

孫兆治俞伯道忽患微熱心下滿頭有汗不能解衆醫

以為濕病用表藥有謂食在膈者治之皆不效召孫
至曰用半夏茯苓湯遂瘥衆問故曰頭有汗心下滿
非濕症乃水結胸膈也水既去其病乃愈且如濕氣
心下滿自當遍身汗若有食心滿頭豈得有汗若言
是表心又不疼不惡寒表症何在故凡水結胸膈頭
必有汗耳

張子和曰有一婦人年三十餘病滑泄經年皆云虛中
有積以無憂散五七日一服至二十服不效又服纏

積丹軟金九諸藥皆不效其人服藥愈速病勢愈甚
飲食日減人或謂曰此休息痢也宜灸中腕及左右
穴臍下氣海及膀胱穴以三里引之每年當冬至日
夏至日灸之前後計萬餘壯忽門外或者曰此病我
屢識蓋傷飲之故即日桃花正開俟其落時以長棘
針刺之得數十萼勿犯人手以白麵和作餅子文武
火燒令熟嚼爛以米引湯下之病人如言服之不一
二時瀉如傾前後六七日計數百行昏困無所知覺

惟索冷水徐徐而飲至六七日少省爾後食日進神
日昌氣血日和不數年生二子

子和治郭敬之留飲四日浮腫不能食脚腫連腎囊痛
先以苦劑涌之後以舟車丸瀘川散瀉之病去如拾
遺又一田嫂姓楊其病嘔酸水十餘年本留飲諸醫
皆以燥劑燥之中腕臍脘以火艾燭針刺之瘡未嘗
合張以苦劑越之其涎如膠乃出二三升談笑而愈
李七老病涌水症面黃而喘兩足皆腫按之陷而復起

行則濯濯有聲常欲飲水不能睡卧張令上涌去痰而汗之次以舟車丸瀉川散下之以益腎散復下之以分陰陽利水道之劑下之水盡瘥

一婦從少年時因大哭罷飲水水困卧水停心下漸發痛悶咸以為冷積治以溫熱劑及禁食冷物一聞氣輒內作如此數年燎灸燒艾瘡孔數千十餘年後小便赤黃大便秘悶兩目加昏積水轉甚流于兩脇世謂水癖或謂支飲硃漆稜茂攻磨之藥竟施之矣食

日衰積日茂上至鳩尾旁至兩脇及臍下但發之時
按之如水聲心腹結硬手不可近者月發五次甚則
欲死已二十餘年張診其脈寸口獨沉而遲此胸中
有痰先以瓜蒂散涌痰五七升不數日再越痰水及
斗數日上涌數升凡三涌三下汗如水者亦三其積
皆去以流濕飲調之月餘大瘥

中丞常子正苦痰飲每食飽或陰晴節變率同十日一
發頭痛背寒嘔吐酸汁即數日伏枕不食服藥罔效

宣和初為順昌司錄于太守蔡達道席上得吳仙丹
方服之遂不再作每遇飲食過多腹滿服五七十九
便已少頃小便作茱萸氣酒飲皆隨小水而去前後
痰藥甚眾無及此者用吳茱萸湯泡七次茯苓等分
為末煉蜜丸梧子大每熟水下五十九

朱氏集驗方
本草綱目

陸養愚治施南石二十九歲患晡熱至天明方解夜熱
尤甚咳嗽無痰咳則痛引胸脇熱甚則咳亦甚咳甚
則痛亦甚初服芎蘇散喘急殊甚易以前胡杏仁桑

皮蘇子葷亦不效後以陰虛治之二冬二母服數月
飲食漸減肌肉羸瘦咸謂勞瘵已成不可療矣最後
一醫診得脈弦數左關尤甚此肝火也用柴胡青皮
黃連赤芍山梔白芥子數劑亦無驗于是苦于藥餌
不延醫已二月診之六脈沉數而滑右關尺更有力
其脇痛若從右而應乎左因思仲景云飲在脇下咳
則引痛謂之懸飲今咳則痛明是其症第十棗湯非
常用之方且病人狼狽已極亦必不肯服乃以潤字

丸料加入甘遂和丸令一二分一服日二服每日加
一分加至五分一服便出稠痰椀許中有一塊半軟
半硬如雞子大脇痛如失熱嗽減十之六七又用人
參白朮歸芍茯苓貝母甘草作煎劑與丸藥間服丸
藥仍日減一分直待便中無痰始止丸藥用前煎劑
日一帖調月餘全安

陳三農治一婦患眩暈腰痛過寅卯二時則日夜昏迷
不省人事身如浮雲中脈細數弦滑細為濕數為熱

弦為飲濕熱痰飲留滯胸膈隨氣升降上涌則為眩
暈下墜則腰痛沃心包致竅不通故昏不省人事至
巳午時心火助其濕熱鼓擊痰涎故昏癡益甚也此
必痛飲所致叩之果然遂以稀涎散涌酸臭痰數升
仍以舟車丸泄如屋漏水者五六次諸症頓愈繼以
解醒湯數服而愈

一貴婦患溢飲遍身虛腫用金沸草散一劑汗出腫減
繼以澤瀉湯加枳實旋覆花前胡四劑安

一婦時疫飲水過多胸膈堅痞咳逆倚息短氣不卧湯
飲入而吐出諸藥罔效作停飲治以五苓散一劑愈
一婦患霍亂飲陰陽水左腹堅硬痛極作留飲治以半
夏旋覆花各三錢澤瀉枳實青皮白朮乾薑各一錢
吳茱萸二分一劑愈

李士材治秦景明素有痰飲每歲必四五發發即嘔吐
不能食此病久結成窠囊非大涌之弗愈也須先進
補中益氣十日後以瓜蒂散頻投涌如赤豆沙者數

升已而復得水晶色者升許如是者七補之七涌之
百日而窠囊始盡耑服六君子八味丸經年不輟

吳乎先治西商王某氣體甚厚病留飲得利反快心下
續堅滿鼻色鮮明脈沉此留飲欲去而不能盡去也

用甘遂甘草半夏白芍加白蜜五匙頓服前症悉痊
或問甘遂與甘草其性相反用之無害而反奏效何
也曰正取其性之相反使自相攻擊以成䟽淪決排

之功

西人賦性厚
尤當用此

張景岳尊人早年善飲後及四旬遂得痰飲之疾嘔酸
脹滿飲食日減眩暈不支驚惕恍惚痰瘧等症相繼
迭出百方治痰無效因慕張子和吐法之妙遵而用
之初用獨聖散茶調散及薑汁之類一吐稍效再吐
再效自此屢用不止雖諸症漸退而元氣勿復也如
此年餘漸覺純熟忽悟其理遂全不用藥但于五鼓
睡醒時仰臥用噉提氣氣有不充則嚥氣為噉隨嚥
隨提痰涎必隨氣至雖最深之痰無不可取其最後

出者形色臭味紫氣酸惡不堪言狀每吐後或至唇
咽腫痛但以涼水一二口漱嚥解之吐畢早膳恣屏
五味用薄粥一二碗以養胃氣自四旬後絕不用酒
行吐法四十餘年自六旬外則一月或半月必行一
次凡吐後神氣必倍王陽道必勃然一切內傷外感
無不盡却蓋道家用督此則用任所用不同所歸一
也不惟却病而且延年後至八旬外猶能登山及燈
下抄錄古書無病而卒

張三錫治一人肩背與膝相引而痛寸脈弦知痰飲為患也投小胃丹一服吐痰半升間日再進一服瀉痰水有如膠者一升許病良已

張子和治一人病留飲者數十年不愈診之左手脈三部皆微而小右手脈三部皆滑而大微小為寒滑大為燥以瓜蒂散涌其寒痰數升汗出如沃次以導水禹功去腸中燥垢亦數升其人半愈然後以痰劑流其餘蘊以降火之劑開其胃口不踰月而痊

朱丹溪治一人素耽于酒患遍身關節腫痛此愈彼劇
胸膈不寬此酒濕痰散在胃流主經絡即流散症也
用二陳湯加酒苓蒼朮羌活威靈仙澤瀉倍葛根而愈
許叔微自患飲癖三十年始因少年夜坐寫文左向伏
几是以飲食多墜左邊中夜必飲酒數盃又向左卧
壯時不覺三五年後覺酒從左下有聲脇痛食減嘈
襟飲酒半盞即止十數日必嘔酸水數升暑月止右
邊有汗左邊絕無遍訪名醫及海上方間或中病止

得月餘復作其補如天雄附子礬石利如牽牛甘遂
大戟備嘗之矣自揣必有澀囊如水之有科臼不盈
科不行但清者可行而濁者停滯無路以決之故積
至五七日必嘔而去脾土惡濕而水則流濕莫若燥
脾以去濕崇土以填科臼乃製蒼朮丸服三月而疾
除蒼朮一斤去皮切末之用白芝麻半兩水盞研濾
取汁大棗十五枚爛煮去皮核以麻汁勻研成稀膏
搜和入白熟杵丸如桐子大乾之每日空腹溫湯吞

下五十九加至百九忌桃李雀鴿初服時必膈微燥
且以茅朮制之覺燥甚再進山梔散一服久之不燥
也山梔散用山梔一味乾之為末沸湯點服

馬元儀治沈表姪因悲哀勞役面色枯白形體憔悴右
脇有塊凝結作痛痛甚則嘔手足厥逆飲食不思大
便時溏時結吐出痰飲動輒盈盆或一日一發或間
日一發苦楚萬狀診其脈左三部弦而勁急右三部
虛微無力方用桂枝理中加桂湯稍安越三日又發

與前方不應乃倍加附子甚安後復發前方又不應
因思仲景傷寒治法有用真武湯一法者原以真陽
飛越水氣上逆故用此以復陽收陰坐鎮少陰北方
之位究其功用全在行水醒脾之妙今因勞鬱所傷
中氣損盛由是所勝之木乘脾所不勝之水侮之而
上逆木橫則痞結作嘔水逆則痰飲泛溢若非真武
何以攝元陽而鎮陰邪耶遂用此方倍加分兩多用
人參連進三十餘劑嘔漸已痰漸少令早服八味丸

晚服附桂理中丸調理諸症悉平惟結塊不除則以
久積陰寒難解恐成痼疾也

繆仲淳治丹陽葛文學字十內人因作家勞鬱患飲症
每發吐嘔不已腸如欲出所吐俱清水動以盆桶計
日夜不止不思飲食就醫金壇諸醫以健脾行氣理
鬱清痰藥投之愈劇困頓待斃計無復之矣繆視脈
審病知為飲無疑乃用半夏廣皮茯苓豬苓澤瀉旋
覆花厚朴白朮枳實川連木香加入參三錢一劑吐

止再劑霍然隨啜糜脾氣漸復至今每病作檢方服之即平

雲門康孟修患寒熱不食久之勢甚危以治寒熱劑投不應徧檢方書與王守泰議投五飲丸立瘥蓋飲症原有作寒熱之條故治飲病自去矣

廣筆記
全上

吳橋治汪鑛始壯輒患嘔逆胸膈痛諸醫悉以膈治骨立而羸久之隨絕而汗如流水漿不能入口診其脈即浮濡不任按無他端曰此停飲爾悞以膈治病者

心悸則氣滯于胸中血從氣行氣阻則血亦阻矣此
二在鐘感也第先屏二在而後治之瘀血當下病者
憊然為間曰敬如公言遂修行氣一劑飲之飲未畢
而痛止徐下黑糞瘀血畢行乃平

太亟
集

程氏有少婦病小腹痛吐痰多嘔清水發熱泄瀉肌削
而屏糞殮乃逆橋六脈沈細弦數曰此積飲也法當
發其積而病可除第病久而孱母伐太過劑以補中
去濕小腹大痛而昏既則嘔盈盤沈沈皆綠水衆異

曰何為有此橋曰吾固以為濕熱也地下濕則生苔

其綠同尋無恙

全上

羅鍊年近壯病中腕病痛連背脇及心間吐清水久之
痛甚如刺刃再信昏昏族醫技窮謂六脈絕矣橋後
至則曰此停飲也痛甚故脈伏非絕也遂以溫補之
劑投之一服而脈見再服而愈

太亟
集

潘頃曰余昔年脾胃受病每日申未時飯至二鼓食消
方寢夜半睡醒噯氣吞酸糟粕乘氣浮上起坐摩娑

久之復寢漫服枳朮平胃散或分消或疏導久不效
自思年六旬外恐脾胃弱不能運化却去晚餐凡粘
硬果物及濕熱酒麵一切不入口不知何以致此因
讀東垣脾胃論乃知陽氣下陷陰火上衝脾胃不實
故耳得一方曰補脾胃瀉陰火升陽湯藥品主佐在
本方并服藥時日所宜所忌切中病情又讀至調理
脾胃治驗謂不可淡滲之劑抑遏陽氣反惹陰邪必
加升陽風藥以羌獨活升麻防風炙甘草根皆入前

藥水煎服乃依方服之片時後陽氣漸升而上不數日陰火漸伏脾胃實而愈

高鼓峰治杭人沈孟嘉妻患吞酸膈痛屢年矣肌肉枯削幾于絕粒診之六脈細數此木乘脾土也先投六君子湯加炮薑十餘劑覺吞酸減半繼用補中益氣湯加半夏炮薑十餘劑而吞酸盡去膈痛亦除次用歸脾湯倍木香加炮薑吞八味丸而愈

吞酸嘈襍

薛立齋治一婦人飲食後或腹脹或吞酸自服枳朮丸
飲食日少胸膈痞滿腿肉疼痛畏見風寒或用養胃
湯腿痛浮腫益甚月經不行此鬱結所傷脾虛濕熱
下注清晨用四君子湯芎歸二陳午後以前湯送越
鞠丸諸症漸愈又用歸脾八珍二湯兼服兩月餘而
經行

一婦人胸滿少食或腹脹吞酸或經候不調此中氣虛
不能施化也用補中益氣加砂仁香附炮薑而飲食

進更以六君芎歸貝母桔梗而經自調

一婦人飲食少思胸中嘈襍頭暈吐痰此中氣虛而有
熱用六君子湯加黑山梔桔梗而愈後因勞碌頭暈
發熱吐痰不食用補中益氣加半夏茯苓天麻而痊
一婦人中腕嘈襍口中辛辣或咳嗽吐痰發喘面色或
白或赤此脾氣虛而肺中伏火也用六君子加山梔
桔梗柴胡及炒黑片苓治之尋愈

一婦人嘈襍吞酸飲食少思大便不實此脾氣虛寒而

下陷用補中益氣湯加茯苓半夏炮薑漸愈又常服
人參理中丸則安

一婦人飲食後嘈雜吞酸此熱鬱為痰用六君子湯送
越鞠丸漸愈又用加味歸脾湯而痊後因怒兩脇脹
痛中脘作酸用四君子湯送左金丸漸安仍用六君
子湯送越鞠丸而瘥

朱丹溪治一人因濕熱病嘔吐酸水如醋用二陳湯加
薑炒芩連蒼朮白朮梔子藿香香附砂仁而愈

陳三農治一婦每食止椀許稍加非大便泄瀉即噎腐
吞酸腹脹痞悶此脾虛寒不能化也用六君子加茱
連藿香香附砂仁神麩煨薑而愈

薛立齋治一婦人飲食每碗許稍加非大便不實必吞
酸噎腐或以為胃火用二陳黃連枳實加內熱作嘔
曰水傳寒中故噎氣吞酸脹滿痞悶不信仍作火治
虛症並至月經不止始信以六君子加炮薑木香數
劑元氣漸復飲食漸進又以補中益氣加炮薑木香

茯苓半夏數劑全愈後因飲食勞倦兼之怒氣飲食
頓少元氣頓怯用前藥便加發熱誠似實火脈洪大
按之而虛兩尺如無此命門火衰用補中益氣加薑
桂及八味丸兼服兩月餘諸症悉愈此症若因中氣
虛弱者用人參理中湯或六君子加木香炮薑不應
用左金丸或越鞠丸虛寒者加附子或附子理中湯
無有不愈

一男子虛弱惡寒食雖熱食亦少作脹吞酸日消瘦服

參苓等藥及灸脾俞等穴不應用八味丸治之而愈此真氣不足不能生土虛火上炎之症也

一婦人年二十餘飲食後每因怒氣吞酸噯腐或兼腿根嫩服越鞠丸等藥不應此脾氣虛濕氣下注而然以六君子湯香附砂仁藿香炮薑數劑少愈更以六君子湯數劑而愈

一男子瘰癧已愈患吞酸服參朮藥不應彼謂餘毒薛治以附子理中丸而愈

張景岳曰予向在都中治一縉紳病吞酸告以為寒彼
執為熱堅持造酒之說以相問難莫能與辨竟為苓
連之屬所斃此見理不真而固執以致釀成大害者

未選
入

續名醫類案卷二十一

欽定四庫全書

續名醫類案卷二十二

錢塘魏之琇撰

頭

有人三代不壽問彭祖祖觀其寢處果有一穴當其腦
戶令塞之遂得壽蓋隙風入耳吹腦則陽氣散頭者

諸陽所聚以主生也

延壽書

竇材治一人起居如常但時發頭痛此宿食在胃腕也

服丁香九十粒而愈

陽明食積頭痛

張子和治南鄉陳君將赴秋試頭頂遍腫連一目狀若

半壺其脉洪大張出視內經面腫者風此風乘陽明

經也陽明氣血俱多風腫宜汗乃與通聖散入生薑

蔥根豆豉同煎一大盞服之微汗次日以草莖塞鼻

中大出血立消

陽明風熱頭痛

王定國病風頭痛至都梁求明醫楊介治之連進三九

即時病失懇求其方則用香白芷一味洗晒為末煉

蜜丸彈子大每嚼一丸以茶清或荊芥湯化下遂名

都梁丸其藥治頭風眩暈女人胎前產後傷風頭痛

血風頭痛皆效

百一選方陽明風熱按此方
惟陽明風熱宜之餘不可服

張大復曰偏頭風之苦病者莫能自言方亦多岐而罕

效戊申予忽病此正悶鬱時周叔明以餅法見寄未

服也五月五日顧民服貽二餅貼太陽上一夕良一

法用南星半夏白芷三味等末爛搗生薑蔥頭為餅

不服不吹不熏視諸方更簡便也

筆談 風痰
用之有驗

姚應鳳治嚴州施盛守三載患頭痛不可忍姚曰法當

取首中骨令八月時收斂難猝治期以明歲春乃割

額探去其骨出瘀血數升頓愈

錢唐縣志 與腦中石蟹畧同

龔子才治杜侍御患頭痛如刀劈不敢移動懼風怕語

言耳鳴目中溜火六脉緊數有力與酒九蒸九晒大

黃為末三錢茶調服一劑而愈

此亦陽明畜熱為病病在至高之地故大

黃必用如

是製法

孫文垣治蔡樂川內人患頭痛痛如破髮根少動則痛

連滿頭暈倒不省人事踰半時乃甦遍身亦作疼胸
膈飽悶飲湯水停膈間不下先一日因怒吐水數次
虬蟲三條今或惡風或惡熱口或渴或不渴大便秘
脉則六部皆滑大有力此痰厥頭痛也先以藿香正
氣散止其吐繼以牛黃黑虎丹清其人事頭仍痛甚
又以天麻藎本各三錢半夏二錢陳皮白芷薄荷麻
黃生薑葱白煎服得少汗而頭痛少止至晚再服之
五更痛止大半人事未全清此蓋中州痰盛非下不

可乃用半夏五錢巴霜一分麩糊為丸每服三十九
生薑湯送下下午大便秘行三次皆稠粘痰積也飲食
少進餘症差可惟遍身疼未盡去改用二陳湯加前

胡石膏藁本薄荷枳殼黃芩石菖蒲調理而安

木感
土衰

朱丹溪治一人因浴冷水發熱頭痛脉緊此有寒濕也

宜溫藥汗之蒼朮麻黃乾薑甘草陳皮川芎二貼得

汗後知病退又與下補藥白芍陳皮半夏白朮蒼朮

人參木通甘草四帖薑水煎服

濕熱

一婦人頭痛發熱而渴白朮陳皮川芎乾葛木通甘草

水煎溫服

陽明病

樓全善治一老婦人頭痛歲久不已因視其手足有血絡皆紫黑遂用三棱針盡刺出其血如墨汁者數盞後視其受病之經灸刺之而得全愈即經所謂大痺為惡及頭痛久痺不去身視其血絡盡出其血是也

三陽

風熱

李時珍治一人病氣鬱偏頭痛用蓖麻子同乳香食鹽

搗搗

煇字
無考

一夜痛止

治標
妙法

李士材治蔣少宰頭痛如破昏重不寧風藥血藥痰藥

久治無功脉之尺微寸滑腎虛水泛為痰也地黃四

錢山藥丹皮澤瀉各一錢茯苓三錢沉香八分日服

四貼兩日輒減六七更以七味丸人參湯送五日其

痛若失

近時上感之病最多觀此
可悟一切乃少陰病

吳孚先治一人患頭痛痛不可禁脉短而溢吳曰頭為

諸陽之首若外邪所乘脉當浮緊而弦今反短溢短

則陽脫于上溢則陰衰于下更加手足厥冷名為真頭痛與真心痛無異法在不治惟猛進參附或冀挽回萬一如法治之果愈

李成章官六安衛千戶善針灸或病頭痛不可忍雖震雷不聞李診之曰此蟲咬腦也合殺蟲諸藥為未吹鼻中二三日蟲悉從眼耳口鼻出即愈

明史

一人素病黃忽苦頭痛不已發散降火歷試無效診得脉大而緩且一身盡痛又兼鼻塞乃濕家頭痛也投

瓜蒂散一匕內鼻中黃水去大盃而愈

大退
濕熱

張三錫屢見苦頭痛百法不應詢之曾生過楊梅瘡用

土茯苓四兩白鮮皮苦參金銀花各三錢黃柏一錢

皂角子三十粒苡仁木通防風各二錢氣虛加參耆

血虛加四物大獲其驗身痛亦效

治法彙
濕毒

一人頭痛脉滑而數乃痰火上攻也二陳荆芥羌活酒

苓不應加石膏二劑稍可終未盡除前方加熟大黃

三錢食遠煎服病去如脫

全上陽
明疫火

一人苦頭痛衆作外感治診得右手寸口脉大四倍于左兩尺洪盛乃內傷氣虛頭痛也外兼自汗倦怠以補中益氣湯加炒黃柏一劑知二劑已

氣虛

一人頭痛而面色黎黑身體羸瘦左寸關俱不應指兩尺獨洪盛因作陰虛治用滋陰四物加黃柏知母元參二服減半十日痊

血虛

一婦苦頭痛悞為外感治發散三黃白虎硝黃愈投愈甚診之氣口急大而數按之即濡右脉亦虛大詢之

先不熱服藥後始熱曰風寒必先發熱在一二日間豈
有先不熱而後熱者此氣虛頭痛也觀其氣短不足
以息餘皆可如今發散過度復耗其氣又復下之復
損其血氣血兩傷宜乎虛火獨熾而身反熱也非大
補詎能挽回遂以補中益氣湯大劑加熟附子一片
為嚮導服下即熟睡覺而痛止第人事不清復加筋
惕肉跳振振不寧彼歸咎于補劑曰虛極所致復更
一醫用柴胡表藥致一身之火游行于外變為斑爛

彼信為傷寒矣化斑承氣日進遂不救

全上

一人頭痛身形拘急惡寒便秘惡心作食鬱治不應診
得氣口脉和平獨尺數而細且行步艱難乃脚氣欲

動也從脚氣治而愈

全上

一人頭痛作外感治不應左脉平和氣口獨盛症兼飽

悶惡心乃食鬱也消導而愈

全上陽明病

一人牙與頭角互痛乃少陽陽明二經火盛之故清胃

散對小柴胡去半夏人參加薄荷石膏二劑瘳

全上

一老嫗頭痛連額發散降火備用不效面上皆出小紅
泡有微水不甚潰一月後痛悉移于右左眼胞上紅
腫且嬾于言動飲食不甜用辛涼愈甚六脉濡弱如
蛛絲初接少弦因作氣虛治六君倍黃耆加蔓荊子
三服後漸安心跳不眠愈急乃以調中益氣湯加茯
神元參棗仁栝子仁連進數服頓愈

全上

東垣常病頭痛發時兩頰青黃眩暈目不欲開嬾言身
體沉重兀兀欲吐潔古曰此厥陰太陰合病名曰風

痰以局方玉壺丸治之灸俠谿即愈是知方者體也
法者用也徒執體而不知用者弊體用不失可謂上

工矣

秘藏醫
說續編

湖南押衙顏思退治頭風掣痛用蠟二斤鹽半斤相和

于錫鑊中鎔令相入捏作一兜鑿勢可合腦量大小

搭頭至額頭痛立止

經驗方
全上

王叔權云予年踰壯寒夜觀書每覺腦冷飲酒過量腦
亦疼甚後因灸顛會穴而愈有兵士患鼻衄不已予

教令灸此穴即愈有人久患頭風亦令灸此穴即愈
但銅人明堂經只云鼻塞不聞香臭等疾而已故
予書此以補其治療之缺然以腦戶不宜針觀之顛
會亦不宜針鍼經只云八鍼以下不宜鍼恐未盡也
叔權母氏隨叔權赴任為江風所吹身體頭動搖如在
舟車上如是半年乃大吐痰徧服痰藥并灸頭風諸
穴方愈

有士人患腦熱疼甚則自牀投下以腦柱地或得冷水

粗得減而疼終不已服諸藥不效人教灸顙會而愈
熱疼且可灸况冷疼乎凡腦痛腦瀉先宜灸顙會而

強間等穴蓋其次也

以上並全
上資生經

薛立齋治一儒者酒色過度頭腦兩脇作痛以為胃虛
而肝病用六味地黃料加柴胡當歸一劑頓安

商儀部勞則頭痛作陽虛不能上升以補中益氣湯加
蔓荊子而痊

王肯堂治一人寒月往返燕京感受風寒遂得頭痛數

月不愈一切頭風藥無所不服厥陰愈甚肢體瘦削
因思此症明是外邪緣何不解語云治風先治血血
行風自滅本因血虛而風寒入之今又踈泄不已烏
能愈哉又云痛則不通通則不痛乃用當歸生血活
血木通通利關竅血脉其人能酒用酒一斗入二藥
其中浸三晝夜重湯煮熱乘熱飲之致醉則去枕而
卧矣然有火鬱于上而痛者宜酒苓石膏之類治之
又方用芎歸熟地連翹各二錢以薄荷二錢放碗內

將滾藥沖下鼻吸其氣候溫即服服之立愈然亦為
血虛者設耳

馬元儀治一友患頭痛經年不愈早則人事明了自午
至亥神氣昏憤不寧作風火治無效診之兩脉俱沈
且滑此太陰陽明痰厥頭痛也用礞石滾痰丸間服
導痰湯以湯滌之次以六君子少加秦艽全蝎調理
而安

張樹滋妹患頭痛累月診之陽脉太陰脉澁曰此陰衰

于下陽亢于上上盛下虛之候也法宜六味地黃湯
加青鉛五錢俾清濁定位斯不治痛而痛自止矣所
以然者以陽氣居上體本虛也而濁氣干之則實陰
氣居下體本實也而氣反上逆則虛頭為清陽之位
而受濁陰之邪陰陽混亂天地否塞而成病矣治之
者不察其脈槩以頭痛為風火專行透解之劑有不
益虛其虛者乎

朱某患頭痛累月苦不可忍咸用散風清火之劑診其

脉浮虛不鼓語言嬾怯肢體惡寒此勞倦中傷清陽
之氣不升濁陰之氣不降也故汗之反虛其表清之
益傷其中其惡寒乃氣虛不能上榮而外固也况脉
象浮虛體倦語怯尤為中虛氣弱之驗與補中益氣
湯升清降濁加蔓荊為使令至高巔一劑知二劑已

一人頭風畏冷首裹重綿三十年不愈以蕎麥粉二升
水調作二餅更互合頭上微汗即愈

李樓怪症奇方
王帶存曰此方

先莊漢伯曾
治族祖經驗

繆仲淳治梁溪一女子頭痛作嘔米飲不能下曰因于
血熱血虛火上炎也麥冬五錢橘紅木瓜茯苓各二
錢白芍三錢枇杷葉三大片蘇子錢半甘菊錢半烏
梅二个竹瀝一盃蘆根汁半碗二劑嘔止頭尚痛加
天麥冬二錢頭痛少止加土茯苓二兩小黑豆一撮

全愈

廣筆
記

沈觀頤中丞傳自一道人頭風神方予僕婦患此痛甚
欲自縊服二劑數年不發土茯苓四兩忌錢金銀花三

錢蔓荊子防風明天麻各一錢元參八分辛夷川芎
各五分黑豆四十九粒燈心二十莖芽茶五錢河水

井水各鍾半煎一鍾服

廣筆記

廣筆記治半邊頭痛屬火症者用之大黃末三分黃芩
末一錢二味和生白酒一碗頗熱調勻服之即愈

立齋治一婦人腦左腫痛左鼻出膿年餘不愈時或掉
眩如坐舟車正許叔微所謂肝虛風邪襲之而然也
以川芎一兩當歸三錢羌活旋覆花細辛蔓荊子防

風石膏藁本荆芥穗半夏麩乾地黃甘草各半兩乃製一料每服一兩薑水煎服而愈

劉雲密曰一婦季冬受寒甚至仲春巔頂並左後腦痛是原病于足太陽寒水寒久化熱鬱熱上行以病于手太陽因風升之化不達而病亦在足厥陰也經謂過在巨陽厥陰者誠然診者云手太陽熱甚于風足厥陰熱勝于濕更謂脾肺亦有鬱熱心有微熱余止治手太陽而微兼肺以上焦合而營諸陽歸于手太

陽之氣化在肺主氣者也並治足厥陰以風升之化
達而手太陽之氣化乃暢更微利小腸以通血脉而
和其氣並心經之熱亦去故不必多治他經也按此

亦治巔頂之一因見寒者溫治之未盡耳

酒片苓二分半酒枯

苓分半蔓荆子二分半防風分半芡連二分半柴胡三分藜本三分升麻二分川芎二分酒黃栢三分當歸三分木通四分牛膝三分水煎一劑愈

嘉祐初仁宗寢疾藥未驗間召草澤醫始用針自腦後
刺入針方出開眼曰好怪怪翌日聖體良已自爾以

穴目為惺惺穴針經初無此名或曰即風府也

畫墁錄宋

張舜

民

吳橋治方簡妻病五年恃體不盡一器至夜則頭岑岑
遠絕遠甦達旦乃定橋至曰食少久卧肌宜腴今且
瘦而脉不數奚病為或婦當娠大損血于頭審是治
二年可受胎復產男而起矣蓋婦嘗妊哭姑髮根有
疣如豆大出血數升匿勿令人知尋免男弗育也治
不補氣專補血果二年而舉子命之曰去病遂如常

太函

集

眉髮

李林甫壻鄭平為省郎林甫見其鬢髮斑白因曰上明日當賜甘露羹鄭郎食之能烏髮翌日食之一夕兩

鬢如黶

瑯琊代
醉編

李卿換白髮方云刮生老薑皮一大升于鐺中以文武火煎之不得令過沸其鐺惟得多油膩者尤佳更不須洗刮便以薑皮置鐺中密封固濟勿令過氣令一

精細人守之地色未分時

黎明也

便須煎之緩緩不得

令火急如其人稍疲即換人看火一伏時即成置于

磁鉢中研極細李方雖云一伏時若火候勻至日西

即成藥也使時以簪脚蘸取如麻子大先于白髮下

點藥訖然後拔之再點以手指熱搥之令入肉第四

日當有黑者生神效

梅師治年少髮白拔去白者以白蜜塗毛孔中即生黑

髮不生取桐子搗汁塗上必生黑者

千金療髮黃熊脂塗髮梳之散頭入牀底伏地一食頃
即出便盡黑不一升脂驗

薛立齋治一男子因大怒發熱眉髮頓落蓋髮屬腎而
眉屬肝此肝腎素虛為怒陰火愈盛銷鑠精血而然
也用六味丸料加柴胡山巵黃栢數劑漸生又二十
餘劑而完

一男子染時瘡服換肌散之類眉毛頓脫遍身作痒或
時赤暈乃燥藥損其陰血陽氣偏旺而然朝用四物

湯倍熟地加茯苓白朮丹皮山梔甘草夕用六味丸料加當歸黃耆治之瘡症既愈眉毛亦生

一男子素不慎房勞其髮忽落或發熱惡寒或吐痰頭暈或口乾作渴或小便如淋兩足發熱或冷至脛屬足三陰虧損而陰火內熾朝用十全大補夕用六味丸料加炒黑黃柏枸杞治之諸症悉退而髮漸生

一男子遍身瘙癢服祛風辛燥之劑眉髮脫落此前藥復傷肝腎精血虛而火內熾所致朝用八珍湯加麥

冬五味夕用六味丸料加當歸黃耆治之風熱退而
眉髮生矣

一儒者遍身作痒搔破膿水淋漓眉毛脫落如癩風症
久服祛風等藥致元氣虧損用補中益氣湯加茯苓
而愈後失調理日晡熱甚用八珍湯加五味麥冬五
十餘劑而痊

面

孫兆治樊樓店家劉三一日滿面皆黑色有相者斷云

不過月餘死既逾月且安遣孫入店與客飲酒遂拜
孫述說其病狀孫診之曰非病也乃為臭氣所熏穢
氣蓄于面部不散故有此色問劉汝一月前聞甚一
陣非常臭氣不能避耶劉曰一日登溷其廁臭氣不
可聞隱忍良久下廁明日遂有此疾孫曰去至臭無
過至香我家有南人將至售香可用沈檀二香各一
兩碎擘焚于爐中安帳內以熏絹被蓋定勿令香氣
散可端坐香邊瞑目靜坐俟香氣散方可出帳明日

引鑑照之劉依其言面色漸變旬日如故

樓全善曰腎臭腐屬水脾臭香屬土廁臭者腐臭也故聞之則入腎而面黑沈香者香臭也故熏之則脾土勝腎水而色還也

蘓子由面有瘡高安丐者趙生謂子由曰君好道而不得要陽不降陰不升故肉多而浮面赤而瘡吾將教君碗水以灌漑子骸經旬諸疾可去子由用其說信

然惟怠不能久故不能極其妙

龍川志畧

治面部生瘡或鼻臉赤風粉刺用盡藥不效者惟有此藥可治神妙不可言每以少許臨卧時洗面令淨如

面油用之近眼處勿塗數日間瘡處自平赤亦消如

風粉刺刺一夕見效閔提點方用生硫黃半錢香白芷

半錢芫青七個去翅足全蠋一個洗炒瓜萋半錢膩粉半錢蟬退五個

洗去泥右為細末麻油黃蠟約度如合面油多少熬鎔

取下離火入諸藥在內每用少許塗面上醫說續編

趙君猷撫幹所傳云有貳卿趙再可知湖州時與一詩

僧相厚而僧患酒齷鼻端生赤贅數枚大者如橘小者如梅李下垂過口飲食言語皆所妨廢良自厭苦之郡有一小兵事刀鑷人但聞其善取齧痣不知其能治酒齷也一旦自言于僧請醫此疾即以藥傅之凡半月餘每日取惡物如膿血自皮膚出者甚多其贅後悉成痂落去鼻面瑩然遂以十千為謝且語貳卿俾直齋閣而求得其方以傳秀邦治人良驗用黃

丹

五文餅藥

五十文著大碓子盛

硃砂

三十文研極細用

巴豆

十個去殼膜紙裏壓

去其油右件同入餅藥罐子中慢火熬三兩沸取下續

入研細生礦灰三錢酒臙鼻用鵝毛掃在紅處一日

一次上藥以追出毒物病退即止雀子斑用小竹棒

兜挑藥點患處纔覺微腫即便洗去恐力太猛並集成全

上

陳三農治隣婦面上一熱即通身躁熱而汗隨之日夜
六七次百治不愈細思之經曰面熱者足陽明病此
脾陰不足而胃火有餘也以山藥為君歸芍地黃為

臣以補脾陰之不足用石膏生甘草以瀉胃火黃耆
麥冬五味以固腠理加竹葉以去煩熱二劑愈

朱丹溪治一婦人面頰兩頰熱腫此膈壅之病也乾葛
桔梗各錢半升麻一錢蘇葉錢半薄荷一錢炙甘草七
分薑一片水煎食後服

王莽遺孔休玉休不受莽曰君面有疵美玉可以滅癥
休猶不受莽曰君嫌其價重乎遂槌碎進休休休方受
之

薛立齋治吳黃門瞻之顛赤腫痛此胃經風熱上攻所致以犀角升麻湯二劑而平又姜大理患此前湯為人所惑謂湯內白附子性溫而不服另用荊防敗毒散愈甚後雖用此湯尚去白附子亦不應後用前方三劑而愈本草云白附子味甘辛氣溫無毒主面上百病及一切風瘡乃風熱之主藥內經曰有是病用是藥苟不用主病之藥病焉得而愈哉

吾進士面患瘡已潰作渴自服托裏藥及降火藥不應

診其脉浮而弱丹溪云潰瘍作渴屬氣血俱虛况脉
浮弱投以參耆各三錢歸朮熟地各二錢數服渴止
又以八珍湯加黃耆數劑脉斂而愈

韓氏子年十四早喪天真面紅腫如風狀不時舉作或
誤用癘風藥內虛發熱口燥煩渴此內傷不足陰火
上痰之類赤遊風症也藥宜滋其陰則火自退

缺

加參耆四十劑又用此作丸服斤許不兩月而痊

癩瘍
機要

許學士治王檢正患鼻額間痛或麻痺不仁如是數年
忽一日連口唇頰車髮際皆痛不開口難言語飲食
亦妨在額與頰上常如糊手觸之則痛作足陽明經
絡受風毒傳入血凝滯而不行故有此症或者以排
風小續命透髓丹之類與之皆不效乃製犀角升麻
湯贈之數日而愈犀角升麻防風羌活川芎白附白
芷黃岑甘草右粗末每服四大錢水煎日三四服

陽明

經絡環唇挾舌起于鼻合頰中循頰車上耳前
過客主人循髮際至額顙今所患皆一經絡也

老母年七十餘累患頰車痛每多言傷氣不寢傷神則
大發上連頭下至喉內及牙齦皆如針刺火炙手不
可犯乃至口不得開言語飲食並廢自覺火光如閃
電尋常涎唾稠粘如絲不斷每勞與饑則甚得卧與
食則稍安知其虛也始以清胃散犀角地黃湯人參
白虎湯羌活勝濕湯加黃芩甘桔皆不效後改用參
耆朮草芎歸升柴桔梗之類稍佐黃芩山梔牛蒡連
翹空腹進之而食遠則服加減甘露飲始漸安然老

人性多躁而不耐閒勞與多言時有之不能除去病根然發亦稀少即發亦不如往歲之劇矣

從子語因喪子鬱結復多餌鹿角膠諸種子藥或于食後臨卧輒進之以至成積于胃遂患面痛如老母之症服清胃散甘露飲重加石膏太過而見虛症又服參耆等補藥而復見火症門人施生以越鞠丸加山梔連翹貝母橘紅之屬開其鬱結而始安然如舊日

矣

連上一條俱自米
選抄入不知誰案

目

孫兆治國婆婆患眼冷淚眼科醫科醫官治二三年不效上召孫孫至曰臣非眼科但有藥耳容進方用石決明一兩赤小豆一兩半半夏五錢生斑貓二十一粒炒去頭足木賊五錢為末薑汁丸如桐子大每服二十九薑湯下方進聖旨下眼科詳定奏曰此方與眼科甚不相涉斑貓有毒恐傷臟腑不敢用合再取聖旨國婆婆聞之曰眼科醫官不惟不能亦不愿使

我治也但合此藥總傷無怨上聞之孫自進藥服經
十餘日愈八分二十日全愈時眼科並降兩官孫賞
錢三十萬

竇材治家中女婢忽二目失明視之又無暈翳細思此
女年少精氣未衰何緣得此症良由性急多怒有傷
肝臟故經脉不調耳遂與密蒙花散一料如舊光明
矣

張子和治女僮目忽暴盲不見物此相火也太陽陽明

血氣俱盛乃刺其鼻中攢竹穴與頂前五穴大出血
目立明

李民範目常赤至戊子年火運君火司天其年病目者
往往暴盲運火炎烈故也李是年目大發張以瓜蒂
散涌之赤立消不數日又大發其病之來也先以左
目內眥赤發牽睛狀如鋪麻左之右次銳眥發亦左
之右赤貫瞳子再涌之又退凡五次交亦五次皆涌
之又刺其手中出血及頭上鼻中皆出血上下中外

皆奪方能戰退然不敢觀書及見日張云當候秋涼
再攻則愈火方旺而在皮膚雖攻其裏無益也秋涼
則熱漸入裏方可擒也惟宜暗處閉目以養其神水
暗與靜屬水明與動屬火所以不宜見日也蓋李因
初愈後曾冒暑出門故痛連發不愈如此涌洩之後
不可常攻使服鼠黏子以退翳方在別集中

趙君玉目暴赤腫點洗不退偶思張語曰凡病在上者
皆宜吐乃以茶調散涌之一涌赤腫消散君玉歎曰

法之妙其迅如此乃知法不遠人人自遠法耳

王之一子十餘歲目赤多淚衆工無效張曰此兜病目
眾當得之母腹中被驚其父曰妊娠時在臨清被圍
乃令服瓜蒂散加麝金上涌而下泄各去涎沫數升
人皆笑之其母亦曰兒腹中無病何吐瀉如此至明
日其目耀然爽明其日又與頭上出血及眉上鼻中
皆出血吐時次用通經散二錢舟車丸七十粒自吐
却少半又以通經散一錢投之明日又以舟車丸三

十粒投之下十八行病更不作

士人趙仲溫赴試病兩目赤腫睛翳不能識路大痛不任欲自尋死一日與同儕釋悶坐於茗肆中忽鉤窻脫鈎其下正中溫額上髮際裂長三四寸紫血流數升血止目快能通路而歸來日能辨屋脊次見瓦溝不數日復故此不藥不針誤出血而愈夫出血者乃發汗之一端也亦偶合出血法耳

一小兒名德孫眼發赤其母買銅碌欲洗兒目煎成家

人誤與兒飲之須臾大吐吐訖立開

樓全善男目珠至夜疼連眉稜骨及頭半邊腫痛用黃連膏點之反甚諸藥不效灸厥陰少陽疼隨止半日又作月餘以夏枯草二兩香附二兩甘草四錢為末每服一錢半清茶調下咽疼減半四五服良愈

一男子所患與前症皆同但黑睛有白翳二點諸藥不效亦以此藥與東垣選奇湯加四物及黃連煎間服并灸厥陰少陽而安

王海藏妻姪女形肥笄年時得目疾每月或二月一發發則紅腫難開如此三年服除風散熱等劑左目反有頑翳從銳眥遮瞳人右目亦有翳從下而上經云從內走外者少陽病從下上者陽明病此少陽陽明二經有積滯也脉短滑而實鼓晨則似短瀼潔古云短為積滯遏抑臟腑宜下之遂用溫白丸減以川芎附子之二多加龍膽草黃連如東垣五積法從二丸加起每日加一丸如至大利然後減丸又從二丸加

起忽一日于利中下黑血塊若干如黑豆大而堅硬

從此漸痊而翳盡去

以上三則皆醫學綱目

廬州知錄彭大辨在臨安暴得眼赤後生翳一僧用蘭

香子

本名羅勒又名香菜又名翳子草

洗晒每納一粒入眥內閉目

少頃連膜而出也一方為末點之李時珍嘗取子試之水中亦脹大蓋此子得濕即脹故能染惹眵淚浮膜耳然目中不可著一塵此子可納三五顆亦不妨

礮亦一異也

本草綱目

張大復云予目初眇有教服三花五子丸者或云緩甚
寧益于用乎遂止揚州張斗嶽謂予淮僧某者久眇
昏然問之則服三花五子丸也此古本所載耳而修
合之法稍異則效不效應焉北歸請以相與予病久
且老無事于方然願得之以濟同病者張信士通劍
術其言多不妄

筆談

張三丰真人治目疾碧雲膏臘月取羯羊膽十餘枚以
蜜裝滿紙套籠住懸簷下待霜出掃下點之神效

即二

百味花草膏

另一製法

兗州朱秀才忽不見物朝夕拜天因夢神傳方用好酸

硝一兩銅器鎔化入飛過黃丹二分片腦二分銅匙

急抄入罐內收之每點少許即愈

張三丰仙方
本草綱目

宋丞相言黃典史病外障翳夢神傳一方用太陰玄精

石陰陽火煨石決明各一兩麩仁黃連各二兩羊子

肝七個竹刀切晒為末粟米飯丸梧子大每卧時茶

服二十九服至七日烙頂心以助藥力一月而愈

朱氏

集驗

方

魏全家富母忽然失明王子貞卜之曰明年三月一日
有從東來衣青者療之必愈至時候見一人著青綢
襦遂邀為重設飲食其人曰僕不解醫但解作犁耳
為主人作之乃持釜就舍求犁轅見桑曲枝臨井上
遂斫下其母兩眼煥然見物此曲枝葉蓋井之所致

也

朝野
僉載

王璽集要詩云赤眼之餘翳忽生草中鷲不食為名塞

于鼻內頻頻換三日之間復舊明又俛惟德原機啓

微方用鷺不食草

本名石胡荽

晒乾二錢青黛川芎各一

錢為細末噲水一口每以米許嚙入鼻內泪出為度

一方去青黛

本草
綱目

經驗方治目障翳以熊膽少許淨水畧調開盡去筋膜

塵土入水片一二片或淚痒則加生薑汁些少時以

銅筋點之絕竒赤眼可用余家二老婢俱以此效熊

膽善辟塵試之之法淨一器塵其上投膽一粒許則

凝塵豁然而開

全上

朱丹溪治飛絲入目紅腫如眯痛澀不開鼻流清涕用

京墨濃磨以新筆塗入目中閉目少時以手張開其

絲自成一塊看在眼白上却用綿輕輕拭出即愈如

未盡再治又飛絲入目用頭垢點入目中即出神效

又眯目鹽與豉置水中浸之視水其渣立出

本草綱目

龔子才治一人兩眼角出烟霧此肝火也以柴胡黃連

等分大劑水煎臨卧頻頻服之數劑乃瘥

仍宜入血藥為安

周漢卿治鄉人蔣仲良左目為馬所躐睛突出如桃他
醫謂係絡已損不可治漢卿封以神膏越三日復故

明史

華州陳明遠瞽十年漢卿視之曰可針也為翻睛刮翳

歛然辨五色

明史

福建按察使沈文敏其母隨養時雙目失明延一醫療
之云障翳已重藥不能效乃先藥之使不知痛尋以
物撥轉眼睛向內一面向外封閉三日而開視物無

一不見云眼睛惟兩角有筋保之故可撥轉然非削

鼻壅手不能也

菽園
襟記

京師法雲寺僧律師失明數年夢中有人授一方治內

外障但神水在者皆可療焉二兩

二兩上脫一味疑
為首烏抄本但字

下空一字又馬
字似烏字之訛

蔓荊子枸杞蒺藜甘菊荊芥穗各一

兩當歸地黃川芎赤芍防風各一兩半十一味末之

水麵糊丸桐子大空腹食前溫水下三二十九僧服

之目復明因目曰夢靈丸

元遺山續
夷堅志

白彥良壯歲常赤目道人曰但能不赤頭則不病此彥

良記之七十餘更無眼疾

延壽書

有人年八十餘眸子瞭然夜讀蠅頭字云別無服藥但

自小不食畜獸肝人以本草羊肝明目疑之余曰羊

肝明目性也

以食百草故

他肝不然畜獸臨宰之時忿氣

聚于肝肝主血不宜于目明矣

延壽書

陳坡次女痘後餘毒上攻遂成內障遍試諸藥半月不

驗後得老醫一方用蛇脫一具淨洗焙燥又天花粉

等分細末之以羊子肝破開入藥在內麻皮縛定用
泔水煮熟切食之凡旬餘而愈其後程錫亦用此取

效

機卷小乘

此案已從居易錄錄入痘門今以其詳細再錄之

萬密齋治孫撫軍淮海患目疾因宦學政時多閱卷而

得今每閱文案則眼珠脹痛用八珍湯為主人參朮

苓炙甘草酒洗當歸酒炒白芍酒炒生地去白朮

其以

燥川芎

以其竅也

加麥冬五味子柏子仁棗仁黃連減半

共十一味孫曰何不用菊花蔓荊子曰凡目疾有外

因內因由風熱得之為外因宜發散所謂火鬱則發之也由久視傷血得之為內因宜以養血為主所謂目得血而能視也服十數劑全愈

孫文垣治吳小峯與弟小川俱病目專科治之益甚其目始紅腫次加太陽痛繼以星翳疊出脉之小峯濡緩而大雨目血縷直貫瞳人薄暮則痛虛小川則洪大鼓指黑珠有浮翳隱澁難開大小便皆不利實

故于小峯用補先以清肝散與之夏枯草五錢香附

四錢甘草一錢五分細茶五分以撒其痛治標藥兩進

而痛止

方法與前樓全善案同

繼用人參茯苓熟地杞子桂心

牛膝破故紙白蒺藜丹皮

治本

桂紙蒺藜

于小川用

瀉內用瀉肝湯及當歸龍薈丸外用象牙冰片末

點之

凡點眼藥研須極細

七日全愈經云實者正治虛者從治

小川之症唯厥陰肝火熾盛肝常有餘者瀉之正治也小峯則下虛又為怒所激怒則火起于肝肝為藏血之地故血絲貫瞳人而薄暮作痛故先用清肝散

以去其痛再用甘溫補下元之虛俾火得歸原此從
治也若用苦寒降火之劑恐血凝而痛加且火激而
愈熾矣

姪孫眼紅腫脹或以苦寒治時疾之劑與之眼愈腫且
增兩太陽痛再加石膏病不減且遍身脹悶寢食俱
廢脉之弦大無力乃用蔓荊子桑白皮柴胡香附夏
枯草甘草芽茶一帖痛定兩帖腫消四帖全愈

一女孩右目紅腫腹中飽乃能開餓則不能開此疳積

虛寒症也以夏枯草二錢甘草穀精各一錢香附一錢五分煎服四帖而安

孫氏婦年過四旬眼赤腫太陽痛大便三日不行經水四日未止諸治不效右目內眥突生一白泡垂與鼻齊大二寸餘嵩科見而却走以為奇疾時眩暈不能少動動則嘔吐益劇孫脉之兩寸關俱滑大有力兩尺沈微此中焦有痰肝膽有火為怒所觸而然經云諸風掉眩皆屬于肝諸逆衝上皆屬于火蓋無痰不

作暈也

然却未

其白泡乃火性急速怒氣加之氣乘于

絡上而不下故暴脹垂下也古壯士一怒目皆裂與此理同治當抑肝木鎮痰火先用薑汁益元丸以壓火止吐再以二陳湯加酒連酒芩天麻滑石吳萸竹茹枳實一帖吐止稍能運動仍以二陳湯加岑連之類赤腫消白泡斂經止而愈

呂東莊治吳綺屋弟患左目痛連腦醫以頭風治之不解初時發寒熱後遂壯熱不止呂珍之曰火伏于內

風燥泉涸木乃折矣非得汗不解也或曰汗須用發

表藥獨非風燥乎且發汗藥須擁被悶卧乃得身熱

甚苦此奈何難得呂曰庸醫發汗皆屬強逼故須擁

被悶卧然而汗不可得也說破此輩伎倆今藥非此

類雖薄衾舒體時雨自至豈能消過哉語欠乃用龍

腦白朮飲子必道遠夜分大汗淋漓次日頭目瘳然

矣龍腦白朮飲子無從考核有謂即

趙氏

加減道遙散未知是否原注

吳浮先治一人目痛取竹葉一片刺鼻之迎香穴出血

而瘡鼻內迎香穴乃手足陽明交經也

治法本張子和

王宗蒼目珠紅赤驚悸腸鳴色夭不澤左手浮空右關尺重按無力吳曰此肝腎交虛不能制遊行之火非肺家實火也朝服加味歸脾湯夕服八味丸不一月白珠紅退脉漸冲和矣

楊賁亨治一貴人患內障性暴躁時時持鏡自照計日責效數醫不愈召楊診曰公目疾自愈第服藥過多毒已流入左股旦夕間當發毒竊為公憂之既去責

人日夕視左股撫摩惟恐其毒發也久之目漸愈而
毒不作貴人以楊言不驗召詰之對曰醫者意也公
性躁欲速每持鏡自照心之所屬無時不在于目則
火上炎目何由愈故詭言令公凝神于足則火自降
目自愈矣兵行詭道惟醫亦然貴人曰良醫也厚禮

而遣之

葯齊漫錄江西
通志載此太畧

范武子嘗患目痛就張處度求方處度因嘲之曰古方
宋陽里子少得其術以授魯東門伯魯東門伯以授

左丘明及漢杜子夏鄭康成魏高堂隆晉左太冲凡
此諸賢並有目疾相傳此方云用損讀書一減思慮
二專內視三簡外觀四旦晚起五夜早眠六凡六物
熬以神火下以氣篔簹于胸中然後納諸方寸修之
一時近能數其目睫遠視尺筭之餘長服不已洞見
牆壁之外非但明目乃亦延年

全上

黃履素曰予少時神氣不足患目每用目少過輒酸澁
無光者累日博考方書多云六味地黃丸可治目予

連服二三料目疾轉甚改用別方補腎氣血之藥始得少愈後讀醫學鈞元有目病不宜服六味丸辨謂

澤瀉茯苓滲水山茱萸不宜于目

山茱萸味酸肝開竅于目經云肝病者

母多食酸

凡肝病皆不宜此三味不惟目也

言之甚詳以予驗之此論

良是然從今思之目病有屬血虛亦有屬氣虛者予血固不足氣則尤虛薛立齋治兩目緊澁不能瞻視以為元氣下陷用補中益氣湯倍加參耆而愈予悔往時不多服前湯而專事于補腎養血致久不痊迨

四十後以指麻多服前湯原無意于治目而目光漸
充始信往時之悞予幼時患風弦爛眼甚受其累百
藥罔效遇一陳姓醫士于長安邸授予白朮藥令敷
于眼皆患處隨敷隨愈取效如神不肯傳方予畧訪
之云有吐虻在內吐虻者小兒口中吐出蛔蟲收乾
候用其中想更有製就蘆甘石配之者真奇方也

張三錫治一人病日久不能視涼藥盡試不應診之兩
手微弱命服八珍加麥冬一月如舊乃知飲食不運

腸胃枯澁髮落皮皴噎膈淋閉等症目昏耳聾悉由
氣液血脉榮衛衰少不能升降出入虛火阻滯而然
故元府閉小濁火炎上則視昏花隔簾視物之象也
丹溪東垣治目昏用參耆補養氣血久靡不獲效以
氣血旺則元府得利升降清明乃服

一人目赤黑珠傍暗赤成瘡耳中痒作腎臟風治用四
生散每作三二服即愈時稱為聖散

聖惠方

一人拳毛倒睫用木鱉子一個去殼為末綿裹塞鼻中

左塞右右塞左一二夜其曉自分

治法

陸肖愚治孫憲副夫人因怒氣患兩目赤痛兩太陽亦痛治及半月赤痛益劇且腫大如桃經行數日不止大便數日不行飲食不進頭眩吐逆脉之左弦右滑上下俱有陽分有餘曰相火寄位于肝膽怒氣觸之其發如龍雷不可逆折病雖上劇而下緩然實因下而逆于上也用醋炒柴胡青皮吳茱萸炒黃連鹽水炒黃栢酒炒黃芩白芍丹皮青黛竹茹為煎劑以抑

青丸合龍薈丸一日夜煎丸各三服遂減大半第大便未行經血未止煎劑仍前以抑青丸合潤字丸投之便行極澁進粥安睡明日諸症俱愈後以清氣養榮湯調理之

一老人年八十四夜能細書詢之云得一竒方每年九

月二十三日桑葉洗目一次永絕昏暗

宜五月五日
六月六日立

冬日採
者佳

倪新溪母陶氏哭子喪失明已十一年忽一人踵門曰

吾能療瞽時其孫上成均宗黨會錢具在其人曰諸君但少留此視之發囊出針針其目兩皆頓能見物撫其孫項曰吾久不覩汝今成人矣新溪得之手百

金謝其人不受而去衆以為神

雲間
稜誌

九江有夫毆其婦致雙睛突出適有兵過其門令勿動取手中水濕盛睛旋轉使其系不亂然後納入即以濕巾裹住令三日勿開其婦性急閉二日遂解巾眼好如故但遇風寒常發痛云解早之故也吳誠有談

奇疾方王
帶存抄輯

晉顧含養嫂失明嘗藥視膳不冠不食嫂耳疾須用蚘

蛇膽含計盡不得有一童子以一合授含開乃蚘蛇

膽也童子出門化為青鳥而去嫂目遂差

晉書

王叔權云即執中也予遊學會稽絕早觀書晨辟方食久之

患目澁俸游而歸同舍遺以鹽精數次搯目而疾除

鹽精且爾則青鹽之治目固也古方用青鹽搯牙因

搯在手洗目而目明鹽精乃鹽倉地下之精英

資生經

唐丞相李恭公扈從蜀中日患眼或澁或生翳膜或即
疼痛或見黑花如豆大累累數十不斷或見如飛蟲
翹羽百方治之不效僧智深云相公此病緣受風毒
夫五臟實則瀉其子虛則補其母母能令子實子能
令母虛腎是肝之母今腎受風毒故令肝虛則目中
恍惚五臟亦然脚氣消中消渴諸風等皆由腎虛也
此僧深得經旨雖未能暢發所以終是唐人高手諸說紛紛徒亂人意耳地黃丸悉主之
用生地黄熟地黄各一斤石防風皆去蘆枳殼麩炒

去蘘牛膝酒浸杏仁去皮尖各四兩右為細末不犯
銕器煉蜜丸如桐子大空心以豆淋酒下五十九豆
淋酒法黑豆半升淨揀簸炒令烟出以酒三升浸之
不用黑豆用此酒煮獨活即是紫湯也

百七方

陸景淵之子患爛弦風眼兩皆昏痛淚漬兩頰皆即成
瘡百藥不效因理故書得此方試點之須臾藥淚俱
下循瘡中流出其間有小蟲自此遂愈甚妙黃連一
兩栢樹皮乾用一兩半濕用二兩右三味咬咀以水

二升煎至五合稍冷用滴目兩眇及洗爛處日三四

用

全上

呪偷針眼已結赤腫未成膿者神驗取患人衣衫角以
手緊捻定于所患眼大眇上搵之每一搵即念一聲
移甚底移撮眼如此一氣念七遍搵七遍訖即隨身
就手撫令緊打一結結定自然便退直候眼安方解
切在志誠不須令病人知呪語或欲自呪自移亦甚

可

全上

朱丹溪治一人病眼至春夏便發當作麯治用黃芩酒浸

南星薑製香附蒼朮俱童便浸連翹各二兩山梔炒一兩川芎童便

浸一兩半陳皮酒浸草龍膽酒蒸蘿蔔子清黛各半兩柴胡三錢為

末神麴糊丸服之旬月而愈治法

華川陳明遠患瞽十齡百藥屢嘗而不見效自分為殘

人松陽周漢卿視之曰是瞽雖在內尚可治用針從

背入睛背捲其翳下之目歛然辨五色陳以為神續文

粹

趙良仁云丹溪先生常用參膏治一老人目暴不明昏
暗如夜正乃靈樞謂氣脫者目不明是也余亦曾治
一士人患頭風連左目墜痛從戴人法于百會上星
出血皆不效遂在頭偏左之足太陽所過第二行與
上星對平按之痛甚處出血立愈由是而言針之與
藥必切中病所藥與邪對然後可愈蓋前人之方不

過立規矩耳

藥要
或問

繆仲淳從父病後眼花服此立愈蓋肝腎二經虛也真

甘枸杞

一斤
去蒂

真懷生地黃

一斤極肥大
者酒洗淨

河水砂鍋內

熬膏以無味為度去渣重湯煮滴水成珠便成膏也

每膏一斤入煉蜜六兩空心白湯化下

廣筆
記

黃學諭潛白患風淚眼每出則流淚盈頰繆仲淳疏一

方寄之穀精草為君蒺藜和枸杞之屬佐之羊肝為

丸不終劑愈

全
上

薛立齋治一男子眼赤痒痛時或羞明下淚耳內作痒
服諸藥不應氣血日虛飲食日減而痒愈盛此肝腎

風熱上攻也以四生散

白附子黃耆獨活沙苑蒺藜

酒調四服而

愈又一人頭目昏眩皮膚瘙癢搔破成瘡以八風散

治之亦愈

立齋曰世傳眼皆初生小胞視其背上即有細紅點如瘡以針刺破眼時即瘥故名偷針實解太陽經結熱也人每試之有驗

張子顏少卿晚年常目光閃閃然中有白衣人如佛相者子顏信之彌謹乃不食肉不飲酒然體瘠而多病

矣一日從汪壽卿求診卿一見大驚不復言但授以大丸數十小丸千餘粒囑曰此十日內服之當盡却以示報既如期視所見白衣人變黃而光無所見矣乃欲得肉食又思飲酒又明日黃亦不見覺氣象異他日矣乃詣壽卿以告卿曰吾固知矣公脾初受病為肺所乘心脾之母也公既多疑心氣不固自然有所覩吾以大丸實其脾小丸補其心肺為脾之子既不能勝其母而病自愈矣

道山清話
未選入

沈存中云予為河北察訪使時病目赤四十餘日黑睛
傍黯赤成瘡晝夜作楚百治不效郎官邱革相見問
予病目如此曾耳中痒否若耳中痒即是腎家風有
四生散療腎風每作二三服即瘥閭里號為聖散子
予傳其方合服之午時一服臨卧一服目反大痛至
二更乃能眠及覺目赤稍散不復痛矣更進三四服
遂平安如舊是時孫和甫學士帥鎮陽聞予說大喜
曰吾固知所以治目矣向久病目嘗見呂吉甫參政

曰頃目病久不差服透冰丹乃瘥如其言修合一劑試服了二三十服目遂愈乃知透冰丹亦療腎風耳

未選
入

龔子才治一人兩目作痛服降火祛風之藥兩目如緋熱倦殊甚用十全大補湯數劑諸症悉退後服補中益氣湯兼六味丸而愈復因勞役午後目溢體倦仍服十全大補而痊

一人目赤不明服祛風散熱藥反畏明重聽脉大而虛

此因勞心過度飲食失節以補中益氣湯加茯神棗仁山藥五味頓愈又勞役復甚用十全大補兼前藥而痊

前日與歐陽叔弼晁無咎張文潛同在戒壇予病目昏將以熱水洗之文潛曰目忌點洗目有病當存之齒有病當勞之不可同也又記魯直語云治目當如治民治齒當如治軍治民當如曹參之治齊治軍當如商鞅之治秦頗有理故追錄之

東坡志林

相國崔公慎由廣察浙西左目背生贅如息肉欲蔽瞳
人視物極礙諸醫方無驗譚簡見曰此立可去但能
安神不撓獨斷于中則必效矣崔公曰如約雖妻子
必不使知譚又曰須用九日清明亭午于靜處療之
若其日果能遂心無憂矣是時月初也至六七日間
忽陰雨甚譚生極有憂色至八九大開霽問崔公飲
酒多少崔曰戶雖至小亦可引滿譚大喜是日于使
宅北樓請飲酒數盃端坐無思俄而譚以手微捫所

患曰殊小事耳初覺似拔之雖痛亦忍又聞動剪刀聲乃白崔曰此地稍暗請移往中庭坐既定聞櫛然有聲先是譚請好綿數兩染縫至是以絳綿拭病處兼傅以藥遂不甚痛請開眼看所贅肉大如小指堅如乾筋遂命投之江中後數日詔徵入秉鈞

因話錄
唐趙璘

金封翁年近七旬病暈厥即類風也小愈後眼花不良于步或教以一味白蒺藜水法為丸每早晚服四錢既可祛風又能明目且價廉而工省纔服數日覺口

咽苦燥再服遂陡然失明重以鬱怒暈厥復作目閉
不語汗出如珠延診脉已散亂姑以熟地二兩杞子
一兩煎服一時醫至不敢主方欲就中加附子一錢
謂重劑純陰宜少入陽藥余曰此症外間多用參附
湯有致筋枯皮黑人未死而半身先死者以衰微之
陰被劫也今症屬三陰虧竭五志之火上炎故卒然
暈厥且病人以誤服白蒺藜之燥失明而病作寧可
再服附子耶乃默然去二味服下神氣漸甦乃減半

入沙參麥冬沙苑蒺藜而愈今常服之兩年許能辨
磁器花色矣後復更醫不知何病而卒

盧玉川年六旬外久病脇痛凡一切香竈古方莫不遍
嘗後一醫與丸方以胡盧巴為君餘多伐肝之品服
之脇痛果暫愈既而一目失明猶不謂藥之誤也再
服則兩目俱損近脇痛轉甚延診以大劑生熟地杞
子女貞沙參麥冬萋仁與之一服即愈始悟向藥之
非然目中黑水神光枯竭已久不能復矣

一人年二十左右求診無他病唯日入則兩目無所見
此即誘語所謂雀盲是也其脉唯左關大左尺極微
語之曰君得毋新婚乎曰然與生地杞子牛膝甘菊
沙參麥冬女貞四劑而愈因戒其房幃樽節否則再
發成廢人矣

方懋缺內人患瘡荆防二味為時師治瘡所不可缺者
服四劑不慮其芳香燥烈竟能致兩目赤腫眵淚成
障也已逾月漸次失明診之兩寸上溢且弦數令以

前方加當歸白芍數服而愈其姪亦同此患時已瞳人迸出不及藥矣

耳

許叔微治一男子年二十歲因瘡毒後腎經熱右耳聽事不真每心中拂意則轉覺重虛鳴疼痛地黃湯生地枳殼羌活桑白皮磁石甘草防風黃芩木通右為粗末每服四錢水煎日二三服不拘時候

綱目

朱丹溪治馮官人左耳鳴此勞得之法當補陰而鎮墜

之黃耆人參當歸陳皮茯苓升麻酒栢防風甘草白

芍食前熱服飲了去眠一覺

綱目其方則似補氣而升舉之非補陰鎮墜也

薛立齋治一人耳內不時作痛痛時欲死痛止如故六

脉皆安非瘡也話間忽作度其有蟲令急取猫尿滴

耳果出一臭蟲遂不復痛或用麻油滴之則蟲死難

出或用炒芝麻枕之蟲亦出但不及猫尿之速也

猫取

尿法用生薑擦

猫鼻其尿自出

趙養葵治一小兒患耳膿醫以藥治之經年累月無效

殊不知此腎疝也用六味丸加桑螵蛸服之而愈

吳孚先治張司馬素有火症兩耳腫痛係少陽風熱勸
延針灸科刺聽會合谷臨泣尋愈

柴嶼青治汪謹堂夫人兩耳蟬鳴昕夕不歇服過人參
熟地數兩無少效柴曰腎開竅于耳心亦寄竅于耳
治耳必責之腎固矣但診得兩尺尚屬有神決非腎
虛左寸亦平緩無疴惟右寸關洪大此肺胃兩部風
熱所壅而致遂不治病而治脉用清解之劑不數服

而右耳已愈再服數劑兩耳全愈因思耳目口鼻雖于五臟各有分屬而內實相通治病惟以切脉為憑夫固有治在此而效在彼者全在一心之圓機活法也

李元淳尚書在河陽日焮入耳無計可為腦悶有聲至以頭擊門柱奏狀危困因御醫療之不驗忽有人獻方用胡麻油作餅枕卧須臾自出乃愈

綱目
經本
草綱目

江湖紀聞云有人壁風入耳頭痛不可忍百藥不效用

稻稈灰煎汁灌入即死而出也又萬莖搗汁滴入亦

能出百蟲入耳

本草綱目

薛立齋治一婦人耳內或耳後項側作痛寒熱口苦月經不調此肝膽經火煎傷脾胃用四君加柴胡升麻黃耆白芍而愈後因勞役怒氣嘔吐脇脹用六君子湯加山梔柴胡而安

一婦人耳內外腫痛胸脇不利寒熱往來小便不調此肝火傷血先用龍膽瀉肝湯四劑諸症頓退又用加

味道遙散而愈又因怒復作用小柴胡湯而痊

一婦人經行後因勞怒發寒熱耳作痛以經行為血虛用八珍湯加柴胡怒氣為肝火用加味道遙散勞役為氣傷用補中益氣湯加山梔而愈

一婦人素鬱怒耳內作痛腫焮寒熱面色青黃經行則變赤用加味歸脾湯加味道遙散而愈

一婦人懷抱素鬱因怒耳作腫痛經行不止寒熱發熱面色青赤肝脉弦數此久鬱傷脾暴怒傷肝先用加

味小柴胡湯隨用加味逍遙散而痊

一婦人因怒發熱每經行兩耳出膿兩太陽作痛胸脇
乳房脹痛或寒熱往來或小便頻數或小腹脹悶昏
屬肝火血虛先用梔子清肝散二劑又用加味逍遙
散數劑諸症悉退乃以補中益氣而痊

一婦人耳內腫痛出水寒熱口苦焮連頸項飲食少思
此肝火甚也用小柴胡湯加山梔丹皮稍愈用加味
逍遙散漸愈用八珍湯加柴胡丹皮山梔調補肝脾

全愈

一婦人耳內腫痛胸脇不利寒熱往來小便不調此肝經濕熱也用龍膽瀉肝湯四劑諸症頓退用加味道遙散而全愈又因怒復作用柴胡清肝散而痊

一婦人耳內不時脹痛內熱口乾勞則頭暈吐痰下帶此肝脾氣虛也朝用補中益氣夕用加味道遙散而痊

一寡婦耳內外作痛不時寒熱脉上魚際此血盛之症

用小柴胡加生地以抑其血而愈又項間結核如貫珠寒熱晡熱用加味歸脾湯加味逍遙散調補肝脾而愈

一婦人耳內外或作痛或赤腫或寒熱月經旬日而止潮熱內熱自汗盜汗此肝脾氣血俱虛而有熱用歸脾湯六味丸而愈

一婦人性急或耳內作痛或耳外赤腫發熱脇脹日晡益甚此怒氣傷肝氣血俱虛朝用加味逍遙散加黃

栝椽梗夕用歸脾湯送地黃丸而愈

一孀婦耳內外作痛或項側結核內熱晡熱月經不調吐痰少食胸膈不利此鬱怒傷肝朝用歸脾湯以解脾鬱生脾氣夕用加味道遙散以清肝火生肝血而愈

一女子耳下腫赤寒熱口苦月經不調小腹內結一塊此肝火氣滯而血凝也先用小柴胡加山梔川芎丹皮又用柴胡清肝散而痊

一婦人耳下腫痛發寒熱與荆防敗毒散四劑表症悉退以散腫潰堅湯數劑腫消大半再以神效瓜蒌散四劑而平

一男子肝經風熱耳下腫痛發熱脉浮數以薄荷丹治之而愈薄荷皂角連翹三棱首烏蔓荆豆豉荆芥

一男子每怒耳下腫或脇作痛以小柴胡湯加青皮木香紅花桃仁四劑而愈

一婦人耳鳴內熱經行不調肢體倦怠飲食無味以為

肝脾虛熱用四君加柴胡山梔丹皮甘草而愈

一男子耳內出膿或痛或痒服聰耳益氣湯不應服防風通聖散愈甚以補腎丸治之而愈

朱余二女中表姊妹也年十六七朱則耳痛常發癢癬因感冒痛暴甚耳門連項皆腫與養青湯加黃芩羚羊蕒仁二劑而愈余則耳痛常流膿水因患瘡醫與荆防發之遂出血不止膈間嘈辣前方去羚羊加知母赤芍二劑血止數劑膿水乾二人脉皆關弦寸鼓

乃腎與肝膽之火也

余早失怙恃困苦顛連年十四就西溪吳氏質庫食力
值冬月查盤提唱勞劇忽右耳暴痛不可忍如刺如
錐約一日夜內起一疱迸出黃水涓滴不絕數日乃
乾第水出則痛減水乾則病除自後過勞即發其痛
至欲求死如是年必數次偶問一醫彼見少年得此
謂由暴怒傷肝瘀血為患教服抵當丸不知此屬勞
傷肝腎龍雷之火上攻而然幸合藥時肆中無蟲蟲

水蛭竟因循不服後年二十餘右耳漸聾痛遂不作
蓋此中經絡枯絕火亦不能透達也

鼻

張子和治常仲明嘗于炎暑時風快處披露肌膚為風
所賊三日鼻塞雖坐于暖處少通終不大解使服通
聖散入生薑葱根豆豉同煎三兩服大發汗鼻立通
矣此由傷風而得

有人患鼻中有瘰肉垂出鼻外不聞香臭用瓜蒂細辛

等分為細末以綿包如豆許塞鼻中須臾鼻即通癢

內化為黃水點滴至盡三四日愈又聖惠方用陳瓜

蒂以羊脂和傅上日三次效

醫學綱目

薛立齋治一男子面白鼻流青涕不聞香臭三年矣

此肺

氣虛也

用補中益氣湯加山梔麥冬而愈

陳都憲夫人患鼻疳爛通鼻孔用鹿角一兩白礬一兩

瓦上煨過人頭髮五錢燈火上燒過為末用花椒湯

洗淨搽藥疳上三四次即愈如不收口瓦松燒灰存

性研末乾糝之即收

一人酒齶鼻紅赤用金花丸晚服

芩連梔栝大黃桔梗
白蕩粉井水為丸

用六味地黃丸全料加當歸二兩苦參四兩空心服

不兩月而愈

孫文垣治吳儀制尚卿弱冠時病鼻塞不能斂者四年

且衄寒月更甚口渴咽喉邊有痰核脉之右寸關洪

滑此肺經痰火症也與前胡秦艽葛根薄荷石膏天

花粉元參貝母山梔甘草白藥子桔梗丹皮四帖而

衄止夜與牛黃三清丸數粒噲之鼻氣即通利能嗅
噲未旬日全愈

一婦人方妙齡表虛易感風寒致成鼻淵流青涕不止
便覺頭暈兩太陽常痛且多噴嚏脉之兩寸洪大用
秦艽酒芩桑白皮馬兜鈴各八分白芍一錢滑石石
膏各二錢枳殼蔓荊子各五分甘草三分四帖而愈
病鼻赤者乃陽明胃經火上炎一方只食鹽一味研細
每晨起撮少許擦齒噲水蕩漱旋吐掌中掬以洗面

行之月餘而鼻色復舊且有益于齒

蘇談

吳浮先治一人患鼻淵十載乃脾肺氣虛下陷須用補中益氣湯百劑方愈不信用白芷防風辛夷川芎等味病轉甚復求治與前方百帖而痊

丹溪治一中年人右鼻管流濁且臭脉弦小右寸滑左寸濡灸上星三里合谷次以酒苓二兩蒼朮半夏各一兩辛夷川芎白芷石膏人參葛根各半兩分七帖服之全愈乃痰鬱火熱之症也

大還

一人鼻中流臭黃水腦亦痛名控腦沙有蟲食腦中用

丝瓜藤近根三五尺許燒存性為細末酒調服即愈

又灸法顙會

在鼻心直上入髮際
二寸再容豆是穴

通天

在顙會上
一寸兩旁各一

寸灸七壯隨臭左右灸嘗見灸後去臭肉一塊從鼻

中出臭不可言而愈

有人卒食物從鼻中縮入腦中介介痛不得出以牛脂
或羊脂如指頭大內鼻吸入須臾脂消物逐脂出也

治法

彙

孫文垣治從姪中叔以暑月赴南雍一日假出索茶飲之趣從左鼻逆流而出入腹者十之三治幾一月即粥飯亦多鼻出矣再藥漸加惡心頭暈肌削四支無力診畢詢醫作何症投何劑曰僉謂此疾書所不載治法無稽或云胃火或云諸逆上衝皆屬于火所用非黃連解毒即三黃石膏及諸苦寒之劑自以多飲火酒因動理或為然然竟無效曰治病貴辨經絡之貫通與臟腑之出納宜拘拘徒守方書而已哉經云咽

喉者水穀之道路氣之所以上下者也吭顙者分氣之所洩也人之涕出不收者吭啞不開也此症亦類是耳吭啞不開故氣上而不下會厭弱而不能揜其氣喉夫鼻與氣喉相通惟不揜故飲食逆從鼻竅而出不見常人偶氣逆則飲食從噴嚏出乎今右脉緩弱無力氣虛明矣經云形寒飲冷則傷肺脾胃喜溫而惡寒因多服寒涼所以惡心頭暈肌消也蓋肺屬金而主氣金氣旺則收斂下降氣下降則飲食自不

逆矣以六君子湯加辛夷桑白皮苾仁沈香一進而
勢緩三進而止大半七劑全安

王執中母氏久病鼻乾有冷氣問諸醫者醫者亦不曉
但云病去自愈既而病去亦不愈也後因灸絕骨而
漸愈執中亦常患此偶絕骨微疼而著艾鼻乾亦失
去初不知是灸絕骨之力後閱千金方有此症始知
鼻乾之去因絕骨也若鼻涕多宜灸顙會前頂大人
小兒之病初無異焉

許知可自停飲食已必嘔服棗膏丸而愈

本事方

孫氏姑鼻不聞香臭有年矣後因他病友人繆仲淳為

處方每服用桑皮至七八錢服久而鼻塞忽然通矣

未選

入


鼻淵

沈晉培年三十許患鼻淵黃濁如膿時醫以為風熱上
淫于腦與薄荷辛夷川芎蒼耳白芷蔓荊古方治之
不效反增左邊頭痛所下涕亦唯左鼻孔多就診曰

此肝火上炎為病耳與生熟地杞子沙參麥冬十餘劑而愈是症由傷風用力去涕而得者易愈若因火盛而成必由水虧而致蓋肝脉上絡顛頂與督脉會腦為髓海為龍火鬱蒸故濃濁腥穢源源而下有若淵然久之督脉之髓亦隨輸泄致成勞損者有之醫學自立齋以前宋元明初諸公未詳肝腎之治至我國朝諸老亦漸講明然多禱耆術桂附惟集靈膏一方最善治法彙載之但云吳中一醫用之所向神效

是亦知其然而未知其所以然也故守堯園一冊者其
覆鉢多矣

一瞽者徐姓年三十來鼻淵年餘醫亦與辛散服之覺
反甚遂堅守不藥之戒此瞽人心靜自能消息病情
故不為庸手所誤後遇予教服集靈膏十餘帖而愈
一費氏子年二十餘亦患此時師與辛夷蒼耳芎芷
荆薄之屬至百二十劑後就診于予兩手脉神氣索
然告以不可治矣果月餘而歿



續名醫類案卷二十二